

Icyizere



Ikinyamakuru cya Komisiyo y'Igihugu yo Kurwanya Jenoside (CNLG) N° 15, 15 Ugushyingo-15 Ukuboza 2011

CNLG yateguye inama ku munsu w' isabukuru y'amasezerano mpuzahanga yo gukumira no guhana icyaha cya Jenoside



Uherye ibumoso, Kayumba Déogratias V/P wa CNDP, Adama Dieng, Umwanditsi Mukuru wa TPIR, Kalisa Edouard Umunyamabanga Uhoraho muri Minisporo na Dr Rusanganwa F.Xavier Komiseri muri CNLG.

Ku itariki ya 9 Ukuboza 1948, nyuma y'imyaka itatu intabara ya Kabiri y'isi yose irangiye, na nyuma y'uko hakorwa Jenoside yakorewe Abayahudi, ibihugu byinshi by'isi byashyize umukono ku masezerano yo gukumira no guhana icyaha cya Jenoside. Biyemeza ko nta Jenoside izongera kuba, « never again, plus jamais ça ». Nyamara icyo cyifuzo cyatanze icyizere kiraza amasinde kuko bitabujije ko Jenoside yakorewe Abatutsi iba nyuma y'imyaka 45 ayo masezerano ashyizweho umukono. Komisiyo y'Igihugu yo Kurwanya Jenoside yateguye iyi nama nkuko isanzwe ibikora buri mwaka kugira ngo higwe ingamba zatuma Jenoside itongera kugira ahandi yongera kuba ku isi.

Iyo nama yabereye muri Hoteli Lemigo ku itariki ya 8 Ukuboza 2011, yafunguwe n'Umunyamabanga

uhoraho muri Minisiteri ya Siporo n'Umucyo(MINISPOC), Bwana Kalisa yanakurikiranywe na visi Perezida wa

Komisiyo y'igihugu y'Uburenganzira bwa Muntu(CNDP), Bwana Kayumba Déogratias, na bwana Adama Dieng, Umwanditsi

Mukuru(Registrar) w'urukiko mpuzamahanga mpabayaha rwashyiriweho u Rwanda(TPIR-

ICTR) kimwe na Professeur Paul Rutayisire, umuyobozi w'ikigo cya komeza ku rup. 4

IBINDI BIRIMO



Basanze amasezerano aha ibihugu inshingano kuberekeye icyaha cya Jenosideurup5



Bamwe mubafatanyabikorwa ba CNLG bitabiriye inama ku iteganyabikorwa.....Urup.8



Bunguranye ibitekerezo ku itegeko ry'inzibutso za jenoside.....Urup.9



Madamu Burizihiza Rose wamaganye igikorwacyo gutera ishyamba ahari imibiri.....Urup.17

Ijambo ry'Ibanze

Nabyo tuzabyirangiriza

Ingaruka nyinshi twatwe na Jenoside, ntabwo abanyarwanda bigeze hari undi biringira uzazibakemurira, uretse kuzikemurira bo ubwabo.

Muri iki kinyamakuru, muraza kwisomera byinshi mu bibazo bigaragara mu kurangiza imanza z'imitungo, imanza zaciwe n'inkiko Gacaca, umwimerere mu muco nyarwanda twihitanyemo, tumaze kubona ko abenshi bari kuzapfa ntabutabera babonye, bitewe n'ubwinshi bw'imanza za Jenoside, bijyanye kandi n'ubwinshi bw'abakoze icyo cyaha cy'indengakamere.

Mu kurangiza izi manza, hari ibimaze kugaragara. Nk. iyo umuntu yishyuye ibyo yononnye, yaba uwishyuye, yaba uwishyuwe bese umutima ujya mu gitereko, ku buryo abenshi bamaze kubona ko izi manza ziramutse zirangiye yaba ari imwe mu nkingi zikomeye zishimangira ubumwe n'ubwiyunge mu banyarwanda. Nyamara ariko mukuzirangiza, haracyagaragara imituzi, ariko twizera ko zizarangira abanyarwanda nibabishyiramo imbaraga. Hari rero abavuga ko nta marangizarubanza bafite kandi baraburanye ku manywa y'ihangu, ayakozwe ntibamenye aho yarigitiye. Hari n'abavuga ko mbere yo kurangiza urubanza hagomba ikashe mpuruza, n'ahari hari ubushake kashe ikaba urwitwazo.

Imbogamizi sinke; kuko hari n'abasahuye umutungo w'abandi mwinshi, ariko ubu bakaba nta mikoro bafite, mbese nta bushobozi bafite bwo kwishyura. Hari n'abahisha imitungo kugirango bagaragara nk'abafite ubushobozi bwo kwishyura. Iki kikaba kidakwiye kwihanganirwa, mu gihe turimo dushishikariza abanyarwanda kurangiza ibibazo no gushimangira ihame ryo kwiyunga. Ibi bikurura inzangano z'urudaca, umujinya udashira n'agahinda gahoraho.

Hari abanga kwishyura bakagambanira imitungo yagombaga gutezwa cyamunara, abumvikana umuyobozi w'akagari atabizi ngo abasinyire byibura hatazagira uza akabitesha agaciro cyangwa akabitambamira, abagitekereza ko Leta izabishyurira ibyo bononnye mu gihe cya jenoside, hakaba hari n'abanyamabanga nshingwabikorwa b'utugari batinya kurangiza imanza ngo kubera umutekano wabo baba batizeye; aba kandi ngo hari n'igihe bakingira ikibaba abagomba kwishyura ntibishyure.

No kubacitse ku icumu imbogamizi ntabwo ari nke, kuko hari ababwirwa ko bakabya, ko mbere ya jenoside nta kintu bari batunze mbese byo kubatesha umutwe. Hari abaka ruswa abacitse ku icumu ngo bakunde babishyurize, hakaba n'abafatirana abacitse ku icumu mu bukene baba bafite bakabishyura ubusabusa.

Aha n'ubwo bikorwa nabi, ubu busabusa barabubona.

Ariko hari n'abatera ubwoba abishyura bavuga ngo n'ubwo bishyurwa ntabwo bazarya. Ibi ni itoteza ritakwihanganirwa kandi rihanirwa. Hari n'abayobozi b'utugari bishyura ntibageze ubwishyu kubo bishyurije. Ingero zihari ni nyinshi! ni ibibazo ariko bikomeye ingamba. Hakenewe ubukangurambaga nk'ubwakoze muri Gisagara, bukaba ubukangurambaga bwo kwishyura ku bushake.

Hakwiye na none gushyirwaho komite ifasha umuyobozi w'akagari kwishyura kandi bakajya bahera ku bafite ubushobozi badashaka kwishyura, hakanashyirwaho umunsi wahariwe gahunda yo kwishyura. Ikindi cyagira akamaro, ni ugushakira amarangiza rubanza abatayafite, ariko n'abaturage bakagira uruhare mu kugaragaza imitungo y'ugomba kwishyura, amafaranga yishyujwe kandi akaba yasaranganywa abangirijwe nta marangamutima, kandi hakaho kwihira igihe cyo kurangiza kwishyura. Ikindi cyagira agaciro, ni ukujya barangiza imanza mu ruhame.

Dufate ingamba rero zo kwesa uyu muhigo wo kwirangiriza ibibazo twasigiye na jenoside .

Gasasira Gaspard

Icyizere

P.O Box 7035 KIGALI, Toll Free: 3560
E-mail : cnlg@rwanda1.com

Kurangiza imanza z'imitungo za gacaca bihagaze gute muri Ngoma na kirehe?

Nyuma ya jenoside yakorewe Abatutsi mu Rwanda, leta y'u Rwanda yagiye ifata ingamba zitandukanye kugira ngo ibashe guhangana n'ingaruka za jenoside. Hagiyeho imiryango, ibigo bitandukanye, n'inkiko Gacaca ni muri urwo rwego zagiyeho.

Mubyo Gacaca yakozwe harimo kuburanga abakoze jenoside, abo icyo cyaha gihamye bagahabwa ibihano bitewe n'ubumere bw'ibyo bakoze. Hari n'ikindi yakozwe ariko na n'ubu usanga kitarangira kijyanye n'abaregeye indishyi z'imitungo yabo yangijwe mu gihe cya jenoside.

Iyo ubajije igitera idindira ry'izo manza z'imitungo zitangira abayobozi baguha imbogamizi zitandukanye. Mu Karere ka Ngoma hari abishyuzwa imitungo irenze ubushobozi bafite, abishyuzwa batagaragaza imitungo yabo. Hari abafite ubushobozi ariko badashaka kwishyura abayobozi bajya kubareba bagasanga baba hari (baba bimeye bakabihisha). Hari kandi no kuba abashinzwe gukurikirana ibyo bibazo bafite inshingano nyinshi bigatuma hadashyirwamo ingufu nyinshi kugirango izo manza zirangire (bakubwira ko umwanya ari muke kandi amadosiye ari menshi).

Hari no kuba babura abaguzi mu cyamunara kandi ngo n'abishyura bishyura buhoro buhoro (batanga make make ugereraniye n'ayo bagomba kwishyura) bityo n'ubu bayahaye ntagire icyo amumarira.

Abatishyura bese si ukuba batishoboye

Iyo wegereye bamwe mu baturage bakubwira ko kutishyurwa biterwa n'uko haba harimo na ruswa bityo ugasanga abayobozi ikijyanye no kwishyuriza imitungo ba nyirayo bakijyendamo gacye, ubwo ugomba kwishyura ntiyishyure kuko nta wamukurikiranye ngo amwibutse kwishyura. Hari n'abajya inama

bakumvikana uburyo uwishyura nta mikoro afite kandi ahari, hari igihe nyir'ukwishyura asiragira kenshi mu buyobozi hanyuma yarambirwa akabiyohorera avuga ati uyu muyobozi mpora iruhande ikibazo cyanjye kidakemuka ntazandeba nabi uwabiyohorera aho kugirango ndebwe nabi n'abantu babiri (uwo nishyura n'ubu mbwira ngo anyishyurize).

Iyo ubajije ubuyobozi icyo buteganywa gukora kugira ngo izo manza zirangire bakubwira ko bagiye gukomeza gahunda yo guteza cyamunara ku binangiyeye (abanze kwishyura kandi bafite ubwishyu), gukora urutonde rw'abafite ubwishyu bakishyura, no gukora urutonde rw'abafite ubwishyu, kandi ko 2012 ibibazo by'imanza z'imitungo za gacaca bizaba byarangiye.

Negereye bamwe mu bayobozi ba Kirehe tunganira ku ngorane, ingamba ndetse no ku gihe baba barihaye kugira ngo abishyurizwa imitungo yabo yasahuwe mu gihe cya jenoside nkuko byemejwe n'inkiko Gacaca babe babonye ibyabo.

Mu nzitizi harimo: kuba bamwe mu bishyuzwa ntawuzi aho baherereye, wabaza n'uwishyura akakubwira ko atazi aho nyir'ukwishyuzwa ari. Abishyuzwa ibirenze ibyo batunze (akaba yarasahuye abantu benshi byose bikaba byaramuhamye muri gacaca akishyura bamwe abandi akabura ubushobozi). Kuba nta rutonde ruhari rw'imanza zaciwe. Izaciwe abenshi ntibarishyurwa. Umwete muke w'abayobozi mu kwishyuriza ba nyir'imitungo.

Nyuma y'izi mbogamizi Akarere ka Kirehe kagiye: -Gukora urutonde rw'imanza zaciwe, abishyura bagasabwa ibyemezo by'inkiko kandi bigakorwa hakurikijwe utugari, hakishyuzwa ku ngufu abinangiyeye.

-gukora raporo y'abafite ubushobozi bwo kwishyura,

- guhuza abafite ubushobozi bwo kwishyura n'abishyura kugira ngo hanarebwe koko ko atabufite kuko hari abavuga ko ntabwo kandi hakorwa igenzura ryimbitse ugasanga babufite.

Abatarishyurwa baruta kure abishyuye

Akarere ka Kirehe kandi karateganywa kurangiza iki kibazo bitarenze kamena 2012.

Utu Turere twombi (Kirehe na Ngoma) n'ubu nta mibare bafite (kuko bese mu gamba bafite harimo gukora urutonde rw'abagomba kwishyurwa n'abazabishyura), iyo bagereraniye bakurikije amaraporo ahari bakubwira ko umubare w'abishyuye ariwo muto ugereraniye nuw'abasigaye.

Ikigaragara ni uko abanyamabanga nshingwabikorwa b'utugari bakomeye ubwunganizi ku bijyanye n'ibibazo cy'imanza z'imitungo muri Gacaca kuko hafi ya bese hari ingorane bahuriyeho yo kuba amadosiye ari menshi umwanya ari muke.

Abagomba kwishyura kandi bafite uburyo bwo kwishyura, bitegereza ko hakoresha ingufu kugira ngo bishyure.

Ni bumve ko ari inshingano bafite bagomba kuzusa. Kutuzusa inshingano zawe ubishaka birakundindiza cyane bikadindiza n'igihugu muri rusange. Umwanya umara ubitekerezaho (utekereza kwica inshingano zawe) wakabaye utekereza ku cyaguteza imbere n'abo muri kumwe.

Tutagiye kure umunyarwanda wese urebwa n'iki kibazo kugira ngo gikemuke vuba hashoboka akoreshe ingufu ze hakorwe n'ibindi. Twese dufatanye dufashe abayobozi bacu kurangiza ibyo bashinzwe neza kandi vuba tutabagoye. Ntitugashake ko buri gihe hakoresha ingufu za leta n'ubu iyo bibaye ngobwa zikoresha.

Gasengayire Jeanne Claudine, umukozi wa CNLG, Ngoma-Kirehe.

ICYIZERE ni ikinyamakuru cya
Komisiyo y'Igihugu yo
Kurwanya Jenocide

Umwanditsi Mukuru:

Gaspard Gasasira

Umwanditsi Mukuru Wungirije:

Antoine Rwagahirima

Ushinzwe Maquette:

Kanzayire Gertrude

Inama y'ubwanditsi:

Bideri Diogène,

Gasasira Gaspard,

Kanzayire Gertrude,

Karengera Ildephonse,

Ndahigwa J.Louis,

Rutagengwa Philibert,

Ruzindaza Jean,

Rwagahirima Antoine,

Urujeni Solange.

ITANGAZO

Komisiyo y'Igihugu yo Kurwanya Jenocide irakangurira Ibigo bya Leta, Ibigo bitegamiye kuri Leta, Ibigo by'Abihayimana n'Imiryango Mpuzamahanga ikorera mu Rwanda, kujya byibuka abari abakozi babo bishwe muri Jenocide yakorewe Abatutsi muri Mata 1994.

Ni uburyo bwo kubasubiza icyubahiro bambuwe.

Ubwanditsi

Irangiza ry'imanza za Gacaca zerekeranye no kwishyura imitungo yangijwe mu gihe cya Jenocide mu karere ka Bugesera

Bugesera ni kamwe mu Turere twakozwehokuburyo bw'umwihariko n'ingaruka za Jenocide yakorewe Abatutsi mu mwaka wa 1994 akaba ariyo mpamvu n'irangiza ry'imanza za Gacaca, by'umwihariko izerekeranye no kwishyura imitungo yangijwe mu gihe cya jenocide birimo inzitizi nyinshi. Mu rwego rwo kumenya uko icyo kibazo giteye n'ingamba zihari kugira ngo abasahuye cyangwa bononnye imitungo y'abandi bashishikariye kwishyura ibyo bangije, twaganiriye na bamwe mu barokotse jenocide bahagarariye abandi, twegera n'ubuyobozi bw'Akarere kugira ngo tumenye uko ikibazo giteye. Umwe mu bahagarariye abacitse ku icumu mu karere ka Bugesera yatubwiye uko bafatanyaga mu gukurikirana icyo kibazo adutangariza ko bimwe mu bituma kidakemuka burundu harimo gutinza nkana igikorwa cyo gushyira mu bikorwa imyanzuro y'inkiko gacaca bikorwa na bamwe mu bayobozi b'inzego z'ibanze, hakaba n'abategetswe kwishyura ibyo bangije bataba mu Karere ka Bugesera.

myiza y'abaturage Madame Narumanzi Léonille, yatubwiye ko icyo ari ikibazo gikomeye gisaba ingufu nyinshi ariko ko hari ingamba zo gukomeza kugikemura kugira ngo izo manza zirangizwe burundu. Yagize ati: “mu byukuri ikibazo cy'irangizwa ry'imanza za gacaca zerekeranye n'imitungo ni ikibazo gikomeye kuko harimo inzitizi nyinshi, muri zo twavugaga nka bamwe mu bangije imitungo y'abandi badafite ubushobozi bwo kwishyura ibyo bangije, hakaba hari n'abantu bashobora kubona indishyi ariko ntibabikore. Icyo dukora ni ugushishikariza inzego zo hasi harimo utugari n'imirengye kwihutira gushyira mu bikorwa ibyemezo by'inkiko gacaca ku byerekeranye n'imitungo kandi hari ingero ko hari umusaruro byatanze kuko hari abari baranze kwishyura, imitungo yabo itezwa cyamunara kugirango bishyure imitungo y'abandi bangije; gusa iyo bigaragaye ko uwishyuzwa ibyo yangije atabifitiye ubushobozi, bisaba ko dutegereza igihe azabonera icyo yakwishyura”

Mu kiganiro twagiranye n'umuyobozi w'Akarere wungirije ushinze imibereho

Yakomeje atumenyesha ko mu rwego rwo kongera ingufu mu irangiza ry'izi manza, ubuyobozi bw'akarere

bwiyemeje gushyira mu mihigo ya buri mwaka ingamba zo kurangiza imanza za gacaca zerekeranye n'imitungo, kandi bigahera mu tugari no mu midugudu, iyo mihigo igahurizwako rwego rw'umurenge mbere y'uko igezwa ku karere. Ku kibazo kijyanye n'igihe giteganijwe kugira ngo izo manza zibe zarangijwe burundu, madamu Narumanzi Léonille yadutangariye ko bigoye kugira ngo wemeze ko mu gihe gito icyo kibazo cyaba gikemutse burundu bitewe n'uko hari abagomba kwishyura ibyo bangije bakennye cyane ku buryo batabona ibyo bishyura.

Ati ni “ikibazo gikomeye gisaba ingamba zihanye kandi inzego zose zikabigiramo uruhare”

Uko bimeze kose biragaragara ko hakwiye kurebwa icyakorwa kugira ngo abacitse ku icumu basubizwe imitungo bangirijwe kuko usanga abenshi muri bo baraheze mu gihirahiro no mu bukene bukabije mu gihe twitegura kwibuka ku nshuro ya cumi n'umunani Jenocide yakorewe Abatutsi mu Rwanda mu mwaka wa 1994.

NDAMAGE Valentin Umukozi wa CNLG mu Turere twa BUGESERA na KICUKIRO

CNLG yateguye inama ku munsi w'isabukuru y'amasezerano mpuzahanga yo gukumira no guhana icyaha cya Jenoside

Ibikurikira urup 1

Kaminuza y'uRwanda ryigisha ugukemura amakimbirane(CCM). Abandi bakurikiranye bagafata n'ijambo muri iyo nama ni uwari uhagarariye Minisitiri w'ubutabera, uwari uhagarariye Urwego rw'igihugu rushinzwe Inkiko Gacaca, n'uwari uhagarariye ikigo cy'ubushakashatsi n'ububiko shakiro kuri Jenoside.

Mu gufungura inama Umunyamabanga Uhoraho muri MINISPO, yavuzeko iyi nama mpuzamahanga ibahaye umwanya wo gutekereza ku ngamba zafatwa mu gukumira icyaha gisumba ibindi, icyaha cya Jenoside. Avuga, yifashihije ibyavuzwe n'Umunyamabanga nshingwabikorwa wa LONI mu kwibuka Jenoside yakorewe Abatutsi ku nshuro ya 17, ko ugukumira icyaha cya Jenoside bireba « sosiyete », bikanareba na buri muntu ku giti cye. Yerekana ibyo Leta y'uRwanda yakozwe mu rwego rwo kurwanya no gukumira Jenoside, rushyira mu rwunge rw'amategeko yarwo, itegeko rihana Jenoside, rwigisha cyane cyane abakiri bato indangagaciro zirufasha kuba abenegihugu bashyira mugaciro(batakwemera ko jenoside yongera kubaho ukundi).

Yabonyeho umwanya wo guhamagarira ibihugu bicumbikiye abakekwaho kuba barateguye bagashyira mu bikorwa Jenoside yakorewe Abatutsi kubacira imanza cyangwa bakabohereza



Prof. Rutayisire Paul (ubanza ibumoso) yatanze ikiganiro ku kamaro ko kubika neza inyandiko zigaragaza Jenoside yakorewe Abatutsi.

gucirwa imanza mu Rwanda.

Ukwifata ku ngingo zimwe z'amasezerano y'1948 nk'ikimenyetso cy'itegura rya Jenoside

Mu ijambo rye ryabanje, Visi perezida wa CNDP yashimye ukureba kure k'u Rwanda rwafashe icyemezo, mu mwaka w'2007, cyo gukuraho ukwifata ubuyobozi bw'uRwanda bwari bwagize ku ngingo zimwe z'ariya masezerano mpuzamahanga, ubwo rwayashyiragaho umukono mu mwaka w'1975. (NDLR : uRwanda icyo gihe rwagaragaje ko rutarebwa n'ingingo ya IX y'ayo masezerano, ivuga

ko za Leta zishobora gukurikiranwa imbere y'urukiko mpuzamahanga rw'ubutabera(cour internationale de la justice)ku ruhare zaba zagize mu byerecyeye icyo cyaha cya Jenoside).

Bwana Kayumba yavuze ko uko kwifata kuri iyo ngingo byagaragaje rugikubita imbuto z'itegurwa rya Jenoside, ariko ko ibyo bihe byarangiye, uRwanda rukaba rwubaka igihugu kigendera ku mategeko : ati: rwavuguruye amategeko mu mwaka w'2004, ruca imanza ku madosiye arenga miliyoni yaburanishijwe n'inkiko Gacaca. Komiseri muri

CNLG Rusanganwa François Xavier, wari uhagarariye Visi Perezida wa Komisiyo y'igihugu yo kurwanya Jenoside, yibukije ko Jenoside yakorewe Abatutsi yakozwe ibihugu by'amahanga bireba, bimwe bikaba byaremeye urwo ruhare rwo kudatabara, ariko ko kugeza ubu nta gihugu cyari cyemera gutanga indishyi.

Ati:«magingo ayahari ibice by'isi byugarijwe cyangwa bigaragamo ibimenyetso bya Jenoside, akaba ari inshingano zacu zo gukumira Jenoside (...) Ni ngombwa kwigisha ababyiruka ukubaha ubuzima.

Bwana Rusanganwa

yasabye abari mu nama umuganda w'ibitekerezo w'uburyo inyandiko n'ibindi bimenyetso bya Jenoside bibitse mu kigo cy'ubushakashatsi n'ububiko shakiro kuri Jenoside byarushaho kubikwa neza no korohera ababikoresha.

Inyandiko zivugwa inyishini izaturutse muri Gacaca, n'izindi zishobora kuzava muri TPIR imaze gufunga, dore ko abari bahagarariye urwo rukiko mpuzamahanga muriyonyamabatangaje ko TPIR yemeye kuba yazaha uRwanda « Kopi » ku nyandiko zose ibitse, igihe ishoje imirimo.

Mu kiganiro

cyatanzwe na Adama Dieng, umwanditsi Mukuru wa TPIR yagarutse ku kintu cy'uko, n'ubwo ariya masezerano mpuzamahanga yo gukumira no guhana Jenoside yari ariho, nyuma ya 94 ari bwo abakoze ibyaha bya Jenoside batangiye guhanwa. Urukiko mpuzamahanga mpambayaha rwashyiriweho uRwanda (TPIR) akaba ari rwo rwabaye urwa mbere mu gushyira mu bikorwa ariya masezerano mpuzamahanga ahana icyaha cya Jenoside.

Yavuze ko ariya masezerano, mbere



CNLG yateguye inama ku munsi w'isabukuru y'amasezerano mpuzahanga yo gukumira no guhana icyaha cya Jenocide

Ibikurikira urup 4

y'uko TPIR ijyaho usanga yari ameze nk'abereye ho kureberwaho n'abakora amategeko ku rwego rw'ibihugu, yo guhana Jenocide, cyangwa kureberwaho n'urukiko mpuzamahanga rw'ubutabera iyo basuzuma niba igihugu runaka cyashinje kugira uruhare muri Jenocide.

Yasobanuye ko mu gihe ubusanzwe mu mategeko ahana impamvu (mobile) yatumye umuntu akora icyaha ititabwaho, mu byerekeye icyaha cya Jenocide impamvu ariyo igize ireme ry'icyaha cya Jenocide, kuko impamvu yo kurimbura ubwoko ariyo ituma ubwicanyi cyangwa ibindi byaha byitwa Jenocide.

TPIR ntiyemera impaka mu rukiko zigamije guhakana Jenocide yakorewe Abatutsi

Ku bijyanye n'icyo TPIR ikora, mu gukumira icyaha cyo guhakana no gufobya jenocide yakorewe Abatutsi, bwana Dieng yavuzeko mbereya 2010, abacamanza b'urukiko mpuzamahanga mu kuburanisha abakekwaho ibyaha bya Jenocide bafataga igihe ku baburanyi bashakaga kwerekana ko nta Jenocide yabaye mu Rwanda, mbere y'uko bumva ukwiregura kwabo ku byaha baregwa.

Icyakora ngo Kuva ku itariki 16 Kamena 2010 urukiko mpuzamahanga rwafashe icyemezo cy'uko ubwicanyi bwabaye hagati ya 6 Mata 1994 na 17/7/1994 ari Jenocide



Uherye ibumoso, Ndahigwa Jean Louis, Umunyamategeko wa CNLG, Komiseri Dusingizemungu Jean Pierre, Mukamazimpaka Hilarie na Ntashamaje Gérard ushinze agashami ko kurwanya ihakana n'ipfobya rya Jenocide yakorewe Abatutsi muri CNLG.

yakorewe Abatutsi, kandi ko urukiko rutazongera kwemera impaka zikururwa n'abaregwa basaba guhabwa ibimenyetso n'abashinje icyaha b'urukiko ko iyo jenocide yabayeho.

Mu bandi batanze ibiganiro, Professeur Rutayisire Paul yagaragaje ibibazo bijyanye no kubika neza ibimenyetso bya Jenocide, ubuhamya, inyandiko za Jenocide ari izavuye mu Nkiko Gacaca, mu nkiko zisanze, ari n'izava muri TPIR. Ati « ukwibuka gukiza kugomba kuba gushingiye ku buhamya bw'ibyabaye,

ubumenyi bwa jenocide yakorewe Abatutsi.. »

Ngo ntibihagije kubika neza ibyo bimenyetso, hagomba no kubaho uburyo bworoshye bwo kubigeraho no kubikoresha. Prof Rutayisire yavuze ko ibibazo bijyanye no kubika ibyo byose binaterwa n'uko mu gihugu nta gahunda ihamye yo kubika inyandiko ihari (système d'archivage), inyandiko zikaba zitatanze hirya no hino.

Bikesha Denis, wari uhagarariye Urwego rw'igihugu rushinzwe Inkiko Gacaca, yasobanuye ukuntu Inkiko Gacaca zashyizweho kugira ngo

zihutishe imanza, ku bantu bagera ku bihumbi 120 bari mu magereza, aho inkiko zisanze zari zashoboye kuburanisha gusa abantu 6000 kugeza mu mwaka wa 2001.

Agaragaza ibishya itegeko rihana abakoze ibyaha bya Jenocide ryazanye, ibyo gushyira mu nzego abakekwaho ibyaha bya Jenocide, kuko uruhare rutangana ku bakoze ibyaha, no gushyiraho imihango yo kwiregura no kwemera icyaha.

Bwana Sindikubwabo Emmanuel, wari uhagarariye Minisitiri w'Ubutabera we yatanze ikiganiro ku butabera no ku ndishyi ku bakorewe Ibyaha bya Jenocide.

Dogiteri Bideri Diogène watanze ikiganiro ku nzitizi inzego mpuzamahanga z'ubutabera zihura nazo, yagaragaje ko amategeko ashiraho TPIR, yashyize imbaraga ku guhana abahamijwe icyaha cya Jenocide, ariko atita ku bakorewe icyaha. Yerekanye ko ayo mategeko adateganya n'indishyi ku bakorewe ibyaha.

Yibukije icyakora ko n'ubwo izo ndishyi zidateganyijwe, hari ingingo ziri ma mategeko agenga imikorere y'urukiko mpuzamahanga (TPIR) (ingingo ya 105 n'ingingo y'106), zivuga ko abo TPIR yahamije

icyaha cya Jenocide, inzego z'ubutabera z'uRwanda zishobora kubakurikira naho indishyi. Agaragaza amategeko y'uRwanda yagombye gukoresha icyo cyanzu cyatanze n'ayo mategeko y'imikorere ya TPIR.

Inama mpuzamahanga yateguwe na Komisiyo y'igihugu yo kurwanya Jenocide yabaye nk'umwanya ukoreshwa mu kutirara, kugira ngo Jenocide yakorewe Abatutsi itazavaho ikurikirwa n'indi, aho ariho hose ku isi, nk'uko byagenze nyuma y'iyakorewe Abayahudi.

A.Rwagahilima

Inzira iracyari ndende kugirango Imanza z'imitungo mu Karere ka Nyanza zirangizwe

Nyuma ya Jenoside yakorewe Abatutsi muri mata 1994 mu Rwanda, abakoze jenoside bashyizwe mu byiciro bitatu nyamukuru aribyo: abateguye jenoside, abayishyize mu bikorwa ndetse n'abasahuye imitungo. Turibanda ku cyicyiro cya gatatu kirebana n'imanza zerekeye imitungo yononwe n'iyasahuwe muri Jenoside zaburanishijwe n'inkiko Gacaca. Mu rwego rwo kumenya uko ikibazo cyo kurangiza imanza z'imitungo mu nkiko Gacaca gihagaze, imbogamizi, ingamba ndetse n'igihe zishobora kurangizwa mu Karere ka Nyanza muri rusange no mu Murenge wa Busasamana by'umwihariko, twegereye abantu batandukanye mugihe twakusanyaga amakuru.

Ku rwego rw'akarere ka Nyanza twavuganye n'ushinzwe imiyoborere myiza adutangariza ko muri rusange abona ko igikorwa cyo kurangiza imanza zijyanye n'imitungo mu nkiko Gacaca kitihuta nkuko bikwiye. Ni muri urwo rwego yatugararije imbogamizi zitandukanye zituma iki gikorwa kitava mu nzira.

Icyambere yatubwiye ko kashe mpuruza iterwa n'urukiko rwibanze ari kimwe mu bituma iki gikorwa kitihuta. Aha twabamenyeshako iyi kashe ariyo ituma urubanza rurangira. Ikindi yadutangarije ko hari abishyuzwa imitungo badafite ubushobozi buhagije cyangwa bakagaragaza imitungo mike.

Uyu muyobozi yagaragaje iyindi mbogamizi ijyanye n'Abanyamabanga shingwa bikorwa b'Utugari batihutisha izi manza kubera izindi

nshingano nyinshi. Yakomeje avuga ko mu byaro hari aho bateza cyamunara hakabura abaguzi. Bityo bikadindiza imanza.

Kubye rekeye ingamba zafashwe n'Akarere harimo: gushishikariza abantu kwishyura ku bushake. Ubwo bukungurambaga bwakozwe n'inzego z'ibanze hamwe n'ingabo. Yagaragaje icyifuzo ko minisiteri y'ubutabera yagombye koroshya ibijyanye na kashe mpuruza kubera ko abacitse kw'icumu bibagora kuyibona.

Mu Murenge wa Busasamana, imanza z'imitungo zarangijwe ziri muni ya 50%

Twegereye na none Umunyamabanga nshingwa bikorwa w'Umurenge wa Busasamana, MUGANAMFURA Sylvestre kugira ngo tumenye ibyerekeye izi manza z'imitungo. Yatangiye atugaragariza ko mu manza 3 625 bari bafite, izigera ku 1 542 zararangiyeye. Yakomeje atubwira zimwe mu mbogamizi bahuye

nazo. Imbogamizi ya mbere yavuze ko hari abakatiwe batari bafite ubushobozi buhagije bwo kwishyura cyangwa se imitungo yatejwe ikaba ifite agaciro kari hasi y'ibigomba kwishyurwa.

Ikindi naho wasangaga imanza zirangizwa mu bihe bitandukanye kandi uregwa ari umuntu umwe. Ibi bikagora uwishyura n'uwishyuriza ababifitiye uburenganzira.

Uyumunyamabanga nshingwabikorwa yongeye kugaragaza ikibazo cyo guhuza imikorere y'abahesha b'inkiko b'umwuga n'abatari ab'umwuga, ni ukuvuga Abanyamabanga nshingwabikorwa b'utugari.

Uko kudakorana kw'abahesha b'inkiko bituma hatabaho gusaranganya neza ku bantu batandukanye bagomba kwishyurwa kubera iyo umuntu afashe umuhesha w'inkiko w'umwuga amusaba ko amurangiriza urubanza vuba bishoboka ku buryo n'abandi bagombye kwishyurwa batamenya rimwe na rimwe ko umutungo watejwe.

MUGANAMFURA yadutangarije kandi ko gusoza ibikorwa by'inkiko Gacaca bitagenze neza. Yatanze urugero rwaho usanga inyangamugayo za Gacaca zarasigaranye impapuro ndangizurubanza

ziteyeho kashe, bikaba byaratumye hari ahagaragaye imanza mpimbano. Yashoje yunga mu ry'ushinzwe Imiyoborere myiza mu Karere ka Nyanza, ko na kashe mpuruza itinza igikorwa cyo kurangiza imanza.

Nyuma yo kugaragaza izi mbogamizi, yatanze ibyifuzo bitandukanye bijyanye n'imanza z'imitungo mu nkiko Gacaca.

Hagombye kubaho imikorandire isobanutse hagati y'urwego rw'igihugu rushinzwe inkiko Gacaca n'urukiko rwibanze mu rwego rwo koroshya ibijyanye na kashe mpuruza.

Yifuje kandi ko inkiko Gacaca zahabwa ububasha bwo gutera kashe mpuruza kubera ko arizo zifite urutonde rw'imanza zarangiye.

Yongeye gusaba ko mu gihe umuntu atabashije kwishyura bitagombye kuba impamvu yo kurangiza urubanza ahubwo dosiye ye yagombye kubikwa ku buryo mugihe abonye ubushobozi yakwishyura bityo inyungu z'ugomba kwishyurwa zikarengerwa.

Kubyerekeye igihe giteganyijwe cyo kurangiza imanza zisigaye, yadutangarije ko bitoroshye kubera ko ibyinshi bitabaturukaho.

Twabamenyeshako umurenge wa Busasamana ari umwe mu Mirenge icumi igize

akarere ka Nyanza.

Tumaze kumva ko kashe mpuruza iri mu bintu bimwe bituma irangizwa ry'imanza ritihuta, twegereye perezida w'urukiko rw'ibanze rwa Busasamana adutangariza ibi bikurikira:

Imbogamizi yambere bahura nayo n'uko rimwe na rimwe amadosiye bahabwa n'inyangamugayo ataba yujuje ibisabwa n'amategeko. Aha baduhaye ingero aho usanga inyangamugayo za gacaca zimwe zitanga imikono itandukanye cyangwa se bamwe mu nyangamugayo ntibashyire imikono kuri dosiye.

Ikindi yagaragaje ko ibitabo birimo dosiye z'imanza zarangiye byasubiye ku cyicaro gikuru cy'inkiko Gacaca, bityo bigatuma batamenya neza imanza zarangiye iyo batizeye ibyatanzwe n'inyangamugayo za Gacaca.

Kubera izo mpamvu batubwiye ko kashe atariyo itinza irangira ry'imanza ahubwo baba basabwa kubanza kugenzura amadosiye neza. Yaba atujuje ibisabwa agasubizwa beneyo hagamagaza wa inteko igomba kwemeza niba izo manza koko zaraburanishijwe. Iyo babyemeje dosiye ziterwaho umukono n'urukiko.

Nyuma yo guhura

n'izo mbogamizi, urukiko rw'ibanze rwa Busasamana rwandikiye urukiko rw'ikirenga ruha urwego rw'igihugu rushinzwe inkiko Gacaca kopi kuwa 14/06/2011.

Basabye CNLG na SNJG kubaha urutonde rw'imanza z'imitungo zarangiye

Zimwe mu ngamba bafashe, nkuko twabitangarijwe na perezida w'urukiko rw'ibanze rwa Busasamana, ni ugukomeza gutumira inteko za Gacaca kugira ngo zemeze imanza zarangiye n'ubwo hari ubwo ngo bemeza ibinyoma kubera inyungu zabo. Akabayarashoje asaba ko Komisiyo y'igihugu ishinze kurwanya Jenoside n'urwego rw'igihugu rushinzwe inkiko Gacaca byatanga urutonde rw'imanza zarangiye mu Karere byibuze bityo bikazabafasha mu kazi kabo ka buri muni kugira ngo irangizwa ry'imanza ryihute.

Twifuje kumenya icyo abacitse ku icumu babivugaho. Mu kiganiro twagiranye n'uhagarariye abacitse ku icumu mu Murenge wa Busasamana utarashatse ko izina rye ritangazwa, yatubwiye ko kubwe imanza z'imitungo zitagenze neza cyane, agaragaza bimwe atekereza ko bitagenze neza.

Yavuze ko hari abacitse ku icumu

komeza ku rup. 7

Inzira iracyari ndende kugirango imanza z'imitungo mu Karere ka Nyanza zirangizwe

Ibikurikira urup 6

batuma hatabaho gusaranganya ibyavuye mu mitungo yatejwe cyamunara. icyambere yadutangariye ko hari abacitse ku icumu bishoboye bakorana n'umuhesha w'Inkiko

w'umwuga kugira ngo imanza zabo zirangire vuba.

Ikindi ni uko iyo zihutishijwe cyane bituma habaho imitungo itezwa cyamunara ku biciro biri hasi cyane

bigatuma abantu benshi bagombaga kwishurwa bidashoboka. Izindi mpungenge yagaragaje ni uko hari inyangamugayo za Gacaca zipfobya imitungo y'abaregwa

cyangwa se zikarya ruswa kubera inyungu zabo bwite.

Hashingiwe kubavuzwe haruguru yifuje ko abahesha b'inkiko bakorana n'abayobozi b'ibanze kugirango

babahe amakuru ahagije kubirebana n'abaregwa gusahura imitungo muri jenoside. Yongeye kuvugako abayobozi b'Utugari nabo bagomba gukurikiza ibyemezo by'inyangamugayo

nyuma y'ubugenzuzi bwimbitse kugira ngo imanza z'imitungo zirangizwe mu mucyo.

Mutabazi R. Moïse

Ikinamico yerekana uruhare rw'abanyamakuru ba Radio RTLM mu iyicwa ry'Abatutsi

Nk'uko byatangajwe na Agence Hirondelle, ku itariki ya 22 Ugushyingo 2011, ku Rwibutso rwa Jenoside rwa Kigali herekanwe ikinamico igaragaza ukuntu Radio RTLM yahamagariye abantu kwica Abatutsi muri

Mata 1994.

Iyo kinamico yahimbwe n'ikigo cyitwa « Institut international du crime politique » cy'i Berlin mu Budage.

Iyo kinamico isubiramo ibiganiro byacaga kuri Radio RTLM bihamagarira kwica Abatutsi, igatam-

butsa n'ubuhamya bw'abarokotse Jenoside yakorewe Abatutsi.

Muri iyo kinamico, abari abanyamakuru ba RTLM, Valérie Bemeriki, Habimana Kantano, na Georges Ruggiu wari ufite ubwenegihugu bw'ubutaliyani n'ububiligi, baga-

ragara bakinwa n'abandi bantu, barimo Dorcy Rugamba, umuhungu w'umuhanzi Rugamba Cyprien wishwe muri Jenoside.

Icyo abahimbye ririya kinamico bari bagamije ni ugukora umukino ugara-

gaza amateka, ukuri kw'ibyabyaye. Abakina abanyamakuru ba RTLM bagasubiramo amagambo bavugaga bakangurira kwica Abatutsi. Byose bikagerageza gukorwa nk'uko byakorwaga icyo gihe.

Hateganyijwe ko iyo kinamico izereka-

nwa mu mijyi itandukanye y'i Burayi kugeza mu Kamena 2012.

NDLR : Twizere ko iyo kinamico yazagira bamwe mu bahakana Jenoside cyangwa bayipfobya ihumura bakabona ukuri.

A.R

Inama nyunguranabitekerezo ku kwishyura imitungo y'abacitse ku icumu yangijwe mu gihe cya Jenoside.

Muri iyi nama yateranyeye ku biro by'akarere ka Huye, habajijwe muri buri Murenge aho iki gikorwa kigeze. Umukozi ushinze iranga mimerere akagaragaza imiterere yacyo. Hari imirengi mike yashoboye kurangiza kubarura no kwandika amarangiza rubanza yashoboye kuboneka. Iyo nk'Umurenge wa Rwaniro, Kigoma ariko indi mirengi myinshi iracyari kure rwose. Iyi gahunda yo kwandika amarangizarubanza ikaba ariyo ngamba bari bihaye mbere ya byose, noneho

yarangira bakabona kugaragaza ibyangijwe n'ibitarangizwa.

Imbogamizi zabayeho ziratanganyije murizo twavugank'izikurikira:

Ubushake buke bw'abayobozi b'utugari bafite mu nshingano zabo kwishyurira abacitse ku icumu; Amarangizarubanza yabuze;

Kuba mu bishyuzwa harimo abakene;

Hari abadafite impapuro z'amarangiza rubanza(photocopies);

Hari abatamera ibyaha bashakira ko imanza zisubirwamo; Hari aho amakuru yabuze abaturanyi b'ushakira kumenya aho imitungo yabo yagiye bakavugaga ko batabizi; Rimwe na rimwe hari igihe biyemeza kuriha bose bafatanyije;

Hari abadafite ubushobozi bwo kwishyura kandi barangije imitungo myinshi;

Itegeko na ryo ni inzitizi kuko rivugaga ko niba ugomba kwishyura afite isambu ingana na 1/5 cya hegitari iyo sambu idakorwaho,

kandi inzu ibamo abantu ikaba itagurishwa

N'ubwo bahuye n'izi mbogamizi ariko, bafite gahunda y'uko ku itariki 31/12/2011 Imirengi yose izaba yangijwe igikorwa cyo kwandika amarangizarubanza.

Muri iriya nama yari yatumiwemo Umuryango "Association Modeste et Innocent"(AMI) iharanira ubumwe n'ubwiyunge, uwo muriyango watangaje ko ufite gahunda yo kuba umuhuza, abahemutse n'abahemukiye bakicara bakabiganiraho byaba

ngombwa uwakoze icyaha agasaba imbabazi uwo yahemukiye. Indi gahunda ya AMI ngo ni uko mu kwishyura habaho gukorwa igikorwa abantu bahuriyeho (engagement communautaire) nk'uko n'ubundi mu gukorwa icyaha cya jenoside abantu bafatanyije (responsabilite collective). Ni yo mpamvu habaho no gufatanyira kwishyura. Urugero: Bashobora kwishyira hamwe bagahingira uwangirijwe imitungo mu rwego rwo kwishyura.

Indi gahunda AMI ifite

ni ugutumira inzego bireba nk'akarere, CNLG, imiryango y'abacitse ku icumu nka AERG,GEARG,IBUKA mu nama nyunguranabitekerezo ikazaba mu ntangiriro z'ukwa mbere 2012 noneho mu mpera zako ibiganiro bikazaba byarangiye. Aho bizanga akaba ari ho hazakoresheka ingufu za Leta..

Ndagijimana Jean Damascène, Umukozi wa CNLG Huye-Gisagara

Abafatanyabikorwa b'ibanze ba CNLG bunguranye ibitekerezo ku mbanzirizamushinga y'iteganyabikorwa by'imyaka 5

Ku itariki ya 23 Ugushyingo, Komisiyo y'Igihugu yo kurwanya Jenocide (CNLG) yamurikiye abafatanyabikorwa bayo umushinga w'iteganyabikorwa ry'imyaka itanu. Ni mu nama yabereye i Kigali muri Hoteli Lemigo iyobowe na Mme Tuyisenge Christine, Visi Perezida wa CNLG. Abafatanyabikorwa batanze ibitekerezo bizafasha impuguke zakoze iryo teganyabikorwa kurinonosora.

Iryo teganyabikorwa ryasuzumwe ryagaragazaga ko ibikorwa byose bya Komisiyo y'Igihugu yo kurwanya Jenocide, mu gihe cy'imyaka itanu byatwarumiliyarisaga 11. Bwana Ildephonse Niyonsenga wayoboye itsinda ryakoze iryo teganyabikorwa yavuze ko bagiranye ibiganiro n'abakozi ba Komisiyo kimwe n'abayobozi batandukanye mu nzego z'ibanze, abahagarariye ibigo byigenga n'ibya Leta kugira ngo bamenye

ibibazo byihutirwa byagombye gukemurwa n'iryo teganyabikorwa, nko kuba nta mibare ifatika (statistiques) bibazo bitandukanye bireba Jenocide(abishwe muri Jenocide, umubare w'abarokotse Jenocide, umubare w'abafite uburwayi budakira bwakomotse kuri Jenocide...), kuba ibimenyetso bimwe bya Jenocide bigenda bisibangana (ubuhamya n'ibindi bimenyetso bifatika bya Jenocide kuba hakomeje kugaragara abantu bahakana cyangwa bapfobya Jenocide.

Mu kugena ibikorwa Komisiyo y'igihugu yo kurwanya Jenocide yashyira imbere, abakoze iteganyabikorwa bagaragaje ibyakorwa hashingiwe kuri buri nshingano ya CNLG mu nshingano icyenda. Komisiyo yahawe. Hagaragazwa icyakorwa na Komisiyo, ndetse n'inzego bafatanyaga, muri buri cyiciro cy'ibikorwa.

Ku byerekeye ubwo bufatanyabikorwa, abari mu nama bagiriye inama abakoze iryo teganyabikorwa ko hagaragazwa neza icyo



Uherye (ibumoso), Niyonsenga Ildephonse wateguye iteganyabikorwa, Mme Tuyisenge Christine, V/P wa CNLG, Ndahigwa J.Louis, Umunyamategeko wa CNLG.

buri rwego ruzakora, hakurikijwe inshingano za buri kigo, kugira ngo iryo teganyabikorwa rizagerweho nta nkomyi. Bityo abateguye ririya teganyabikorwa bakaba barasabwemo kunonosora inyandiko hakurikijwe ibitekerezo byatanze, kandi bakongera kwegera inzego nka Minisitiri y'ubuzima, iy'uburezi, n'izindi nzego zikorana cyane na CNLG kugira ngo ibyo CNLG isanga byakorwa

n'izo nzego bafatanyaga bihuzwe n'inshingano cyangwa ubushobozi bwa buri kigo cyangwa buri rwego.

Ibikorwa byagaragajwe bizashyirwa imbere byinjira mu byiciro binini bikurikira:

Gukorwa ubukangurambaga bw'abaturage ku byerekeye ugukumira no kurwanya Jenocide;

kongerera ubushobozi Komisiyo y'igihugu yo kurwanya Jenocide, Guha imbaraga ikigo cy'ubushashatsi n'ububikoshakiro cya CNLG, no Kongera imbaraga mu gukora ubushakashatsi no kwegeranya inyandiko n'ibindi bimenyetso kuri Jenocide(harimo no kwegeranya ubuhamya, bukandikwa aho kugira ngo ubutangwa cyane cyane mu gihe cy'icyunamo busigara aho bwavugiye, no kubungabunga imibiri no gukora ubuvugizi mu kuzamura imibereho y'abazize Jenocide

yakorewe Abatutsi.

Ku byerekeye ukongerera ubushobozi Komisiyo y'igihugu yo kurwanya Jenocide, imbanzirizamushinga y'iteganyabikorwa rya CNLG mu myaka itanu iri imbere yaganirwaho, usanga ishira imbaraga ku kintu cyo gushimangira itumanaho, Komisiyo ikagira abakozi (antennes) mu nzego z'ibanze, kandi bakagira imikorere n'uburyo bw'itumanaho bwihuse.

Ikindi ngo n'uko CNLG yajya itangaza ibyegeranyo bikubiyemo ibyemezo by'inkiko Gacaca, n'uburyo imanza za Gacaca zarangijwe. Ibyinayamakuru bigashishikarizwa no kugenera umwanya ibyo byemezo by'Inkiko Gacaca n'uburyo byashyizwe mu bikorwa.

Ibikorwa biteganywa n'iriya mbanzirizamushinga byamurikiye abari mu nama ni byinshi, ariko umushinga uhamye w'iryo teganyabikorwa

uzaboneka ari uko abariteguye babanje kubonana n'abafatanyabikorwa, hakagaragara icyo buri rwego rwaba rushinzwe ku bikorwa bahuriyeho.

Gusa icyagaragaye ni uko hakiri byinshi byo gukora, mu gihe imibare y'ifatizo myinshi ijyanye n'ingaruka za Jenocide itari yaboneka yafasha Komisiyo Y'igihugu yo kurwanya Jenocide kugira ibipimo bifatika bigaragaza intambwe igenda iterwa. Ibikorwa bigaragara bizatwara amafanga atari macye. Ariko bisaba ubufatanyabikorwa, buri wese mu nshingano ze, kugira ngo Komisiyo y'igihugu yo kurwanya Jenocide igere ku ntego, ikubiyemo kwibuka, kurwanya no gukumira Jenocide n'ingengabitekerezo yayo, n'ubuvugizi kugira ngo imibereho y'abacitse ku icumu irusheho kuba myiza.

A.R



Abafatanyabikorwa n'abakozi ba CNLG nabo bitabiriye iyo nama ku iteganyabikorwa by'imyaka itanu.

Ibitekerezo ku ihindurwa ry'itegeko NO 56/2008 ryo kuwa 10/09/2008 rigena inzibutso n'amarimbi by'abazize jenocide yakorewe Abatutsi mu Rwanda

Mu nama y'umunsi umwe yahuje Abakomiseri, abafatanyabikorwa na bamwe mu bakozi ba Komisiyo y'Igihugu yo kurwanya Jenocide(CNLG) mu cyumba cy'inama cy'iyi Komisiyo tariki ya 7/12/2011, bunguranye ibitekerezo ku ihindurwa ry'Itegeko NO 56/2008 ryo kuwa 10/09/2008 rigena inzibutso n'amarimbi by'abazize Jenocide yakorewe Abatutsi mu Rwanda.

A tangiza iyo nama Visi Perezida wa Komisiyo y'igihugu yo kurwanya Jenocide Madamu Tuyisenge Christine yashimiye abayitabiriye ababwira ko ikigamijwe ari ukungurana ibitekerezo harebwa uburyo hanozwa imbanzirizamushinga y'itegeko rivugurura iryari risanzweho, Itegeko n° 26/2008 ryo ku wa 10/09/2011 rigena inzibutso n'amarimbi by'abazize Jenocide yakorewe Abatutsi.

Ingingo ya 1: Iri tegeko rigengainzibutsoz'abazize Jenocide mu Rwanda (Mu itegeko rivuguruye inyito irimbi ryakuwemo).

Ingingo ya 2: Muri iyi ngingo hasobanurwa Jenocide icyo ari cyo; Jenocide ni Jenocide yakorewe Abatutsi hagati y'itariki ya mbere Ukwakira 1990 n'ya 31 Ukuboza 1994. Urwibutso rwa Jenocide ni ahantu hashyirahamwe abantu bazize Jenocide yakorewe Abatutsi, habitswe bimwe mu bimenyetso bya Jenocide cyangwa hadashyirahamwe, hafite cyangwa hasobanura amateka yihariye mu itegeko rya Jenocide.

Yasabye bwana Ndahigwa Jean Louis umunyamategeko muri Komisiyo kugeza ku bari mu nama ibice bigize itegeko ryari risanzwe n'ibyo bifuzako byahinduka.

Bwana Ndahigwa Louis, yagejeje ku bari mu nama ibikubiye mu nyandiko ya mbere yateguwe yitwa "Ibitekerezo ku ihindurwa ry'itegeko N° 56/2008 ryo ku wa 10/09/2008 rigena inzibutso n'amarimbi by'abazize Jenocide yakorewe Abatutsi mu Rwanda".

Yagejeje ku bari mu nama ibisobanuro by'uko iryo tegeko ryari risanzwe riteye n'ibitekerezo byatanzwe ku ihindurwa ryaryo. Hatanze kandi ibisobanuro ku magambo amwe n'amwe akoresheye muri iryo tegeko no ku

ningo zizavugururwa ku buryo bugendanye n'igihe, hitawe no ku buryo bwo kuzarishyira mu bikorwa.

Yakomeje asobanura ibikubiye muri buri ngingo n'uko yakorewe ubugororangingo. Zimwe mu ngingo zakorewe ubugororangingo ni izi zikurikira:

Ingingo ya 1: Iri tegeko rigengainzibutsoz'abazize Jenocide mu Rwanda (Mu itegeko rivuguruye inyito irimbi ryakuwemo).

Ingingo ya 2: Muri iyi ngingo hasobanurwa Jenocide icyo ari cyo; Jenocide ni Jenocide yakorewe Abatutsi hagati y'itariki ya mbere Ukwakira 1990 n'ya 31 Ukuboza 1994. Urwibutso rwa Jenocide ni ahantu hashyirahamwe abantu bazize Jenocide yakorewe Abatutsi, habitswe bimwe mu bimenyetso bya Jenocide cyangwa hadashyirahamwe, hafite cyangwa hasobanura amateka yihariye mu itegeko rya Jenocide.

Ingingo ya 3: isobanura ko inzibutso z'abantu bazize Jenocide yakorewe Abatutsi ziri mu mutungo rusange wa Leta

Ingingo ya 4: Iyi ngingo ivuga ibijyanye no gushyirahamwe imibiri y'abantu bazize Jenocide yakorewe Abatutsi Muri iyo ngingo hasobanurwa uruhare rwa buri rwego muri icyo gikorwa. Imibiri y'abantu bazize



Bunguranye ibitekerezo bamaze gusobanurirwa ibyo bifuzako byahinduka mu Itegeko.

Jenoside yakorewe Abatutsi ishyingurwa mu cyubahiru mu nzibutso za Jenocide bitangiye uruhushya n'akarere urwibutso ruherereyemo bikamenyeshwa CNLG. Iyo ari urwibutso rwo ku rwego rw'Igihugu uruhushya rutangwa na CNLG. Iyi ngingo itaravugururwa ntiyari isobanutse kuko havugwaga ko uruhushya rutangwa n'urwego rubishinzwe.

Ingingo ya 5: Igaragaza uruhare rw'ubuyobozi mu gushyirahamwe, Ubuyobozi bw'Akarere bufite inshingano yo gushakisha imibiri y'abazize Jenocide yashyirahamwe nabi no gukora ibishoboka ngo ishyingurwe mu cyubahiru mu gihe kitarenze amezi 3 kuva iyo mibiri ibonetse aho kuba amezi 6 nk'uko itegeko rya mbere ryabiteganyaga.

Ingingo ya 6: Isobanura uburyo bwo kwimura imibiri y'abazize Jenocide.

Imibiri y'abazize Jenocide yari yarashyirahamwe yimurirwa mu nzibutso za Jenocide ziteganywa n'iri tegeko, nyuma yo kugisha inama Komisiyo y'Igihugu yo kurwanya Jenocide.

Ingingo ya 7: Iyi ngingo ivuga ko Akarere ariko gashyirahamwe uburyo bwo gucunga umutekano w'inzibutso za Jenocide ziri mu ifasi yako.

Ingingo ya 8: Ivuga ku myubakire y'inzibutso, uburyo bukurikizwa mu kubaka inzibutso za Jenocide, gushyirahamwe mu cyubahiru imibiri y'abazize Jenocide n'uburyobwokuzifata neza biganirwaho n'Ubuyobozi bw'Akarere bw'aho urwibutso ruzubakwa Minisiteri ifite ibikorwa remezo mu nshingano zayo na Komisiyo y'Igihugu yo kurwanya Jenocide.

Bibaye ngombwa hitabazwa impuguke mu myubakire y'inzibutso. Buri rwibutso rw'abazize Jenocide yakorewe Abatutsi rugira

ikimenyetso kiruranga cyagenwe na Komisiyo y'Igihugu yo kurwanya Jenocide.

Ingingo ya 9: Ivuga ko uretse ibikorwa bikorerwa ku nzibutso biteganywa n'iri tegeko, ibindi bikorwa bihakorerwa bitangirwa uruhushya na Komisiyo y'Igihugu yo Kurwanya Jenocide aho kuba Minisiteri ifite kwibuka mu nshingano zayo nk'uko byari biteganyijwe mu itegeko rya mbere.

Ingingo ya 10: ivuga ku byiciro by'inzibutso: hashyirahamwe inzibutso za Jenocide zo ku rwego rw'Igihugu no ku rwego rw'Akarere. Buri rwibutso rwa Jenocide rugira ikimenyetso cya Jenocide kiruranga.

Muri buri Karere hari nibura urwibutso rumwe ruri mu rwego rw'Akarere. Hashobora kubaho kandi inzibutso za Jenocide ahandi hantu hose hafite cyangwa

hasobanura amateka yihariye ya Jenocide nko mu bigo by'amashuri, mu bigo bya Leta n'ahandi. Itegeko n° 56/2008 ryo ku wa 10/09/2008 rigena inzibutso n'amarimbi by'abazize Jenocide yakorewe Abatutsi mu Rwanda ryongewemo ingingo ya 11,12,13 na 14.

Ingingo ya 11: Ivuga urwego rureberera inzibutso. Inzibutso za Jenocide yakorewe Abatutsi ziri mu Rwanda no hanze zirebererwa na Minisiteri ifite kwibuka mu nshingano zayo naho CNLG igakurikirana imicungire yazo. CNLG ifatanyije n'inzego bireba iteganyaga amahugurwa ku bakozi bashinzwe imicungire ya buri munsi y'inzibutso za Jenocide.

Ingingo ya 12: Ivuga ku micungire y'inzibutso ku rwego rw'Igihugu. Urwibutso rurebererwa

komeza ku rup. 13

Imyigishirize y'isomo ry'amateka ya Jenoside yakorewe Abatutsi iracyacyeneye kunozwa



Inama yatumiwemo inzego za Leta zitandukanye, harimo SENA, MINEDUC, CNUR, KIE, n'izindi Kaminuza.

Ibi ni ibyagaragaye nyuma y'inama nyunguranabitekerezo ku myigishirize y'amateka ya Jenoside mu mahuri, yateraniye ku cyicaro cya Komisiyo y'igihugu yo kurwanya Jenoside(CNLG), ku itariki ya 06/12/2011. Inama yahuje abakozi ba CNLG n'abafatanyabikorwa batandukanye, barimo Minisitiri y'uburezi, Komisiyo y'igihugu y'ubumwe n'ubwiyunge, Aegis Trust, Itorero ry'igihugu, Komisiyo y'igihugu y'uburenganzira bwa Muntu, CCM, n'abahagariye za Kaminuza zitandukanye zo mu Rwanda.

Komisiyo y'igihugu yo kurwanya Jenoside yagize igitekerezo cyo gutumiza iyi nama ihereye kuri raporo ya sena imaze igihe igaragaje ko amwe mu mashuri yisumbuye arangwamo ingengabitekerezo Jenoside, na nyuma y'uko inama yokuwa 15/09/2011 yahuje MINEDUC

n'abafatanyabikorwa bayo yigaga ku burezi mu Rwanda, igaragaje ko gahunda yo kwigisha amateka ya Jenoside yakorewe Abatutsi mu mashuri muri iki gihe itanoze.

CNLG ikaba yaratumije iyo nama ishingiyeye kuri imwe mu nshingano yahawe yo kurwanya no gukumira Jenoside n'ingengabitekerezo yayo.

Abari muri iyo nama babanje kugaragaza imiterere y'ikibazo kijyanye no kwigisha amateka ya Jenoside yakorewe Abatutsi.

Uhagariye Minisitiri y'Uburezi yasobanuye ko isomo ry'amateka ya Jenoside yakorewe Abatutsi ryigishwa mu mashuri abanza, amashuri yisumbuye ndetse na Kaminuza. Ariko uburyo iryo somo ritangwa n'igihe rigenerwa akaba aribyo basanze bidahagije. Mu mashuri abanza rifite amasaha 9 ku mwaka, mu mashuri yisumbuye rifite amasaha 14 ku mwaka, muri Kaminuza ryigishwa gusa n'abo mu ishami

ry'amateka.

Imfashanyigisho ziri hirya no hino zahuzwa

Ku byerekeranye n'imfashanyigisho nazo, mu mashuri yisumbuye, nta gitabo cy'umunyeshuri gihari, hari gitabo cyamwarimu gusa ku bijyanye n'iryo somo ry'amateka, kandi nabwo icyo gitabo ni icyo mu cyiciro rusange gusa. Icyo gitabo kikaba gifite amapaji atatu gusa avuga kuri Jenoside yakorewe Abatutsi.

Mu kungurana ibitekerezo, abari mu nama basanze hari imfashanyigisho zitandukanye zikoreshe mu kwigisha ibijyanye na Jenoside yakorewe Abatutsi. Hari gitabo cy'amateka cyateguwe na Komisiyo y'ubumwe n'ubwiyunge kirimo n'ibika bivugaga kuri Jenoside yakorewe Abatutsi, hari imfashanyigisho Komisiyo y'igihugu yo kurwanya Jenoside

n'abantu bose mu gikorwa cyo kwigisha cyangwa cy'ubukangurambaga. Basabye kandi ko isomo ry'amateka ya Jenoside ryaba itegeko mu mashuri yose. Muri Kaminuza rikigishwa mu mashuri yose aho kwigishwa mu ishami ry'amateka gusa.

Ku byerekeranye n'imyigishirize y'iryo somo, basanze ndetse byaba byiza ko hategurwa integanyanyigisho yakoherezwa za Kaminuza zo hanze, kuko nta kivuga ko iyo izo kaminuza zigisha amateka ya za Jenoside zabayeho ku isi baba bafite ubumenyi bwa ngombwa kuri Jenoside yakorewe Abatutsi.

Isomo ry'amateka ya Jenoside yakorewe Abatutsi ryaba itegeko mu mashuri yose

Ku bijyanye n'igihe cyagenewe iryo somo, abari mu nama basanze iryo somo, ryigishwa mu cyiciro cya « social studies », ritangwa mu mpera z'umwaka, maze abarimu babona umwaka ugiye gushira batarangije gahunda bagafata ku masaha yarigenewe. Bifujye ko iryo somo ryajya ryigishwa mbere, kandi rikaba itegeko.

Kuba iryo somo ryaba itegeko, abunguranaga ibitekerezo basanze ko kugira ngo iryo somo ribe itegeko, ari uko habaho itegeko ribiteganyana, imbanzirizamushinga y'iryo tegeko ikaba yategurwa na Minisitiri y'uburezi.

Kubera ko isomo ry'amateka ya Jenoside ari isomo ridasanzwe, abanyeshuri barikurikira bakaba bidakwiye ko baryigira gusa kubona amanota, ahubwo rikabahindura rikana bacezamo umuco w'amahoro, abari mu nama bifujye ko abarimu bazigisha iryo somo, babanza bagahugurwa.

Iyo utekereje uburyo Jenoside yakorewe Abatutsi ari ikintu cyateguwe kikigishwa imyaka myinshi, kugira ngo ibashe kugeza uRwanda aho yarugejeje, bigufasha kwiyumvisha ukuntu ari ngombwa kwigisha isomo ry'amateka ya Jenoside yakorewe Abatutsi no gukora ubukangurambaga bugera ku baturage bose bubereka ibibi byayo.

Antoine Rwagahirima



Abari mu nama bifujye ko isomo ry'amateka ya Jenoside riba itegeko mu mashuri yose.

Abakozi b'ikigo cya Letagisakaza imiti (RBC) basuye abagize koperative "Tera Intambwe ubeho"

Ku itariki ya 4 Ugushyingo abakozi ba RBC/ Medical Procurement and Distribution Division (Iyahoze ari CAMERWA) basuye TERINTAMBWE UBEHO, koperative y'abagore bacitse ku icumu rya Jenoside yakorewe Abatutsi kandi bafashwe ku ngufu muri Jenoside batuye mu murenge wa Kibirizi mu karere ka Gisagara. Aba bakozi baganiriye na bo ndetse babagenera n'inkunga yo kubafasha kwiteza imbere.

Intego y'uruzinduko rw'aba bakozi yari ukugira ngo basure abanyamuryango ba TERINTAMBWE UBEHO kugira ngo babaganirize bumve ko hari abantu babatekereza ho, babafite ku mutima, bityo bibahe ingufu zo kurenga ibibazo batiteye, ahubwo batewe n'inkoramaraso zabiciye imiryango zarangiza zikabafata ku ngufu.

Gufatwa ku ngufu kw'aba bagore



Banahawe inkunga izabafasha kwiteza imbere kugira ngo bakore bave muri ubwo bwigunge.

byabaviriyemo gutwara inda batifuzaga, babyara abana batagira ba se bazwi kuko umuntu yafashwe n'abarenze umwe kandi mu gihe kimwe.

Bamaze kubasha kwiyakira, bibumbiye muri Koperative.

Ikintukijyakibababaza cyane kurusha ibindi, aba bagore bari abakobwa b'inkumi, abandi ari abangavu interahamwe zibambura

ubusugi bwabo ari nako zibigambaho. Nyuma yo kugirirwa nkana gutyo abo bagore bakomeje kubana n'ako gahinda cyane cyane ko bamwe muri bo bahanduriye agakoko gatera SIDA none ubu bamwe babana n'ubwandu.

Ikindi kibazo cyakomeje kubatoneka ni icyo kuba ngo batagira icyiciro babarizwamo nk'abacitse ku icumu. Si abapfakazi ba jenoside, si imfubyi zayo ahubwo ngo ni « ibindi ». Ariko

byose.

Bahawe inkunga y'amafranga

Uretse ibiganiro byiza bibubaka bagiranye n'abakozi ba RBC, banahawe inkunga izabafasha kwiteza imbere kugira ngo bakore bave muri ubwo bwigunge. Iyo nkunga ikaba ingana n'amafranga miliyoni imwe n'ibihumbi magana abiri mironko ine y'u Rwanda (1,240,000frw).

Aba banyamuryango bakaba bemeza ko iyi nkunga bazayibyaza umusaruro batangiriye ku korora ihene. Kandi

Twatekereje kubasura mu gihe cy'icyunamo ariko ntibyadukundiye none turaje kandi ndizera ko wenda mwatugaye gutinda naho guhera byo ntibyari gushoboka.

Tuje kugira ngo tubereke, tubabwire ko ibibazo mwahuye nabyo tubizi kandi tubazirikana ».

Ati « biteye agahinda ariko ntimukwiye kumva ko muri ibicibwa kuko nibyababayeho nta ruhare mwabigizemo ». Abashimira intambwe bateye yo kwishyira



Itsinda ry'abacitse ku icumu bafashwe ku ngufu n'abashyitsi babasuye mu ifoto y'urwibutso.

nyamara na bo bacitse ku icumu.

Abacitse ku icumu bagiye bahura n'ibibazo bitandukanye, bimwe birushije ibindi ubukana, ariko hari icyo bahuriyeho bose cyo kuba baracitse ku icumu. Aba bagore rero, nk'abantu bahuje ibibazo, bishyize hamwe bagira ubutwari bwo kuvuga ibyababayeho bibumbira muri Koperative TERINTAMBWE UBEHO, kandi bazi ko hari icyizere cyo kubaho nyuma y'ibyo bibazo

n'ubuyobozibw'umurenge wa Kibilizi bwabijeje ubufatanye maze nyuma y'igihe gito ntibazababagitegereje akimuhana ahubwo bazababashoboye kwifasha.

Mu ijamba rye umushyitsi mukuru Félicité DUSABE wari uyoboye iryo tsinda ry'abakozi ba RBC yagize ati: » banyamuryango ba TERINTAMBWE UBEHO muraho, nti mugaherane n'agahinda kandi duhari.

hamwe, abasaba gukomereza aho kandi abizeza ko bazakomeza kubavuganira.

Mbere y'uko abashyitsi basubira i Kigali habayeho igikorwa cyiza cyo gushyikirana no gusangira. Uru ruzinduko rwabasigiye akanyamuneza.

N T E Z I R Y A Y O
J.Damascene umukozi wa CNLG
HUYE-GISAGARA.

UWASHATSE KUBONA URIRA ABONE USEKA

Impfubyi n'Abapfakazi muri ibi bihe by'iminsi mikuru ya Noheli n'Ubunani, nimubegere mubahe ibyiringiro. Nimubakande aho bababara, mubahumurize aho babara, bave mu cyabateye gukomereka, bitari ukwibagirwa ibyababayeho, ariko byibura bagire ibyiringiro mu buzima bwabo. Mubahe umuceri n'isukari n'ibindi, kuko udashobora kubwira umuntu ngo nasusuruke mugihe utamuhaye icyo yifubika. Tubikore muri iyi minsi mikuru ariko dukomeze byekurangirana nayo. Mubabwire amagambo meza abafasha gusohoka mu maganya cyangwa guhora mu kiriyo. Tubibutse ko hagomba kubaho igihe cyo kurira ariko ko, n'igihe cyo guseka kigomba kubaho. Nimuseke, uwababujije guseka abone museka. Noheli nziza n'Umwaka mushya muhire wa 2012.

GASASIRA Gaspard

Imibiri itarashyingurwa iri mu Tugari tugize Umurenge wa Mukura izimurirwa mu rwibutso rwa Cyeru



Urwibutso rwa Cyeru ruzasubiza ikibazo cy'imibiri idashyinguye neza mu Murenge wa Mukura.

Ubwo twasuraga Kagari ka Cyeru, mu Bwana Mazimpaka Murenge yadutangariye ko urwibutso rurimo kubakwa i Sahera mu wo mu Karere ka Huye, shingwabikorwa w'Uwo Murenge ruzarangira kubakwa

rutwaye hagati ya miliyoni 13 na miliyoni 15. Rukabango ruzakira imibiri y'inzirakarengane zishwe muri Jenoside yakorewe Abatutsi, ikinyanyagiye hirya no hino mu Tugari tugize uwo Murenge. Emwe hari n'indi mibiri iri imbere y'ibiro by'Umurenge wa Mukura nayo yagombye kuzimurirwa muri urwo rwibutso. Mu murenge wa Mukura hari ahantu hane hashyinguye abantu. Imbere y'ibiro by'umurenge wa Mukura hashyinguye abarenga 2000 na bo bashyinguwe mu masashe. Hariho gahunda yo kuzabakuramo bakajyanwa mu rwibutso rw'umurenge ruriho rwubakwa ku kagari ka Cyeru. Aha naho hari abandi bazavanwamo bagashyingurwa muri iyo mva rusange iriho

yubakwa iruhande rwaho bashyinguye.

Kwa MUVUNYI hari abarenga 16 bari mu musarane harimo n'abo mu muryango we. icyo we yakoze ni ugushyiraho beto kuri uwo musarane none iyo beto imaze kwangirika kuburyo ishobora no kugwamo. Ariko ubu arasaba ko bavanwamo bakazashyingurwa hamwe n'abandi ubutaha.

Kwa Deo Ngenda bari barokotse ku kabakobwa bazanywe aho kwa Ngenda bicirwa mu mingoti y'imirimaye, nyuma bakurwamo bashyingurwa mu masashe aho mu murima wa Muvunyi. Aba na bo bagomba kuvanwa aho bakazashyingurwa muri iyo mva irimo yubakwa ku kagari ka Cyeru.

A.R

Uko ikibazo cyo kurangiza imanza z'imitungo zaciwe n'Inkiko gacaca gihagaze mu Karere ka Gicumbi

Akarere ka Gicumbi gaherereye mu Ntara y'Amajyaruguru, gafite Imirenge 21, Utugari 109, abaturage 374,636. Akarere ka Gicumbi kari muturere twagiye tugira ibibazo mukurangiza imanza z'imitungo za gacaca. Imirenge yari ifite imanza ikaba ari imirenge yabayemo Jenoside cyane kurusha indi. muri iyo mirenge hari: Mutete, Muko, Rutare, Rwamiko, Nyamiyaga, Ruvune, na Byumba. Imanza zikaba zisigaye mu mirenge itatu ariyo: Mutete, Muko, Byumba.

Ibibazo bituma izo manzazitarangira, zizanyane

n'abantu batishyuye kubera kubura ubwishyu kandi bigaragara koko abo bantu nta bushobozi bafite bwo kwishyura, n'ikibazo cy'abahesha b'inkiko bagiye badindiza imanza kubera ikimenyane cyangwa kudasobanukirwa inshingano zabo. Hari n'abantu bagiye bahisha imitungo yabo cyangwa bakayandika ku bandi kugirango batishyura.

Nkuko twabatangarijwe na Bwana Mukunzi Focus, uwungirije umuyobozi ushinze imiyoboreze myiza mu Karere ka Gicumbi, Akarere kafashe ingamba kugirango imanza z'imitungo zirangire burundu.

Hari nko kubarura imanza zose zitarangiye muri buri kagari no kumenya impanvu zitarangiye; guhugura Abanyamabanga nshingwabikorwa b'Utugari n'Imirenge kuri icyo kibazo; kuganira n'Abahesha b'inkiko kugira ngo bashyiremo imbaraga kugirango izo manza zirangire. Aho bigaragaye ko uwakatiwe adafite ubwishyu agahuzwa n'uwo agomba kwishyura bo ubwabo bakunvikana uburyo yamwishyura, haba mu gukoresha imbaraga ze amukorerera, cyangwa akamubabarira.

Hejuru y'izo ngamba, Akarere ka Gicumbi igihe kiyemeje kuba karangije

imanza z'imitungo bitarenze werurwe 2012.

Mu murenge wa Byumba, umwe mu mirenge igize Akarere ka Gicumbi, ikibazo cy'imanza z'imitungo gisigaye mu tugari tubiri: Nyarutarama hasigaye abantu babiri naho mu kagari ka Kibari hari umuntu umwe.

Twaganiriye na bamwe mu baturage bo mu Murenge wa Byumba bafite ibibazo by'imanza z'imitungo, bamwe muri abo baturage twaganiye harimo batatu bafite imanza zaciwe ariko bakaba bavuye ku batishyurwa kubera ubuyobozi bw'akagari butabyitaho.

Gashumba Claver na

Mukamwambutsa Donatira basahuwe imitungo yabo bakaba bagomba kwishyurwa.

Abasahuye imitungo yabo ni abantubazafatanyakuyishyura buri muntu agatanga amafaranga ibihumbi ijana na mirongo itanu na bibiri na magana arindwi (152,700 frw), ariko abamaze kwishyura ayo mafaranga ni babiri, umwe yishyuye amafaranga ibihumbi mirongo irindwi (70,000), undi yishyura amafaranga ibihumbi mirongo itanu (50,000).

Rugira Laurien, we yasahuwe inka esheshatu, ariko urukiko rwasomye urubanza rwe rumusaba ko yemera inka eshatu n'ubwo

uwo muturage avugaga izo zose zari zarabyaye). Ubwo urukiko rwategetse ko yishyurwa inka eshatu, kandi ko abantu basahuye izo nka uko ari batandatu (6) bagomba kwishyura buri umwe agatanga amafaranga ibihumbi mirongo irindwi nabitano (75,000 frw). Ariko ubu amaze kwishyurwa n'umuntu umwe gusa.

Abaturage banatugararije ko bifuzaga ko ubuyobozi indetsen'inzeho zibishinzwe zabafasha bakishyurwa imitungo yabo basahuwe kuko izo manza zose zaciwe mu mwaka wa 2009.

UWAMAHORO Esperance, CNLG/Gicumbi

Ibitekerezo ku ihindurwa ry'itegeko NO 56/2008 ryo kuwa 10/09/2008 rigena inzibutso n'amarimbi by'abazize jenoside yakorewe Abatutsi mu Rwanda

Ibikurikira urup. 9

na Komisiyo y'igihugu yo kurwanya Jenoside ku bufatanye n'Akarere urwo urwibutso rurimo.

Ingingo ya 13 : Ivuga ku micungire y'inzibutso ku rwego rw'Akarere. Imicungire y'inzibutso za Jenoside ku rwego rw'Akarere ikorwa n'Akarere urwo urwibutso rwubatsemo.

Ingingo ya 14: Imicungire y'inzibutso ziri hanze y'igihugu Komisiyo y'Igihugu yo kurwanya Jenoside ifatanye n' Ambasade y'Igihugu urwibutso rurimo mu micungire yarwo.

Ingingo ya 15: Ivuga ibiranga urwibutso rwa Jenoside. Ibikubiye muri iyo ngingo n t i b y a h i n d u t s e . Hongewemo ko buri rwibutso rwa Jenoside rwo ku rwego rw'Akarere rugira igishushanyombonera cy'inzibutso zose ziri mu ifasi yako.

Ingingo ya 16: Imibiri y'abazize Jenoside itarashyinguwe. Imibiri y'abazize Jenoside

itarashyinguwe kubera impamvu zo kubika ibimenyetso bya Jenoside ku buryo burambye igomba gutunganywa ikabikwa mu nzibutso za Jenoside mu buryo itangirika hitawe ku ikoranabuhanga rigezweho ryo gufata neza imibiri, igashyirwa ahantu mpeshagaciro kandi igasurwa gusa mu buryo bwo kunamira abazize Jenoside. Imibiri itarashoboye gutunganywa ngo ibikwe mu buryo buteganywa ishyingurwa mu cyubahiro mu gihe kitarenze amezi 3 kuva iri tegeko ritangajwe aho kuba umwaka umwe nk'uko byateganywaga mu itegeko rya mbere.

Ingingo ya 18: Abakozi bashinzwe inzibutso. Buri rwibutso rugira abakozi ba ngombwa bashinzwe gucunga no gufata neza ibiranga urwo urwibutso kandi bafite ubumenyi buhagije bubafasha gusobanura neza amateka ya Jenoside. Aha hasobanuwe ko



Abari mu nama banifuje ko ku bijyanye n'inyubako hakwitabwaho no kubafite ubumuga.

inzibutso zo ku rwego rw'igihugu arizo Bisesero, Nyarubuye, Murambi, Nyamata na Ntarama zifite abo bakozi (2) bagenwa n'itegeko.

Icyiciro cya II kirebana

n'amarimbi rusange cyavanweho.

Icyiciro cya III : Gisobanura ibihano bihabwa abangiza imibiri y'abazize Jenoside, gusenya inzibutso, kwiba imibiri n'ibindi.

Ibyumvikanyweho byahinduka mu itegeko ni inyito y'itegeko, kunoza ibirebana n'umutekano w'inzibutso ni ukuvuga ko inzibutso zacungwa n'umuntu ufite intwari (imbunda) hakabaho za standars. Ikindi cyumvikanyweho ni imicungire y'umutungo ukomoka ku nzibutso byazitabwaho bikazashyirwa mu yindi nyandiko (document), kugaragaza uruhare rw'abacitse ku icumu mubijyanye no gushyingura.

Abari mu nama banifuje komubijyanyen'inyubako hakwitabwaho no kubafite ubumuga

ndetse zikaba zubatse mu buryo bujyanye n'ikoranabuhanga.

Kubijyanye no kubungabunga inzibutso n'imibiri irimo ndetse n'ibindi bimenyetso nk'imyenda ... bifuje ko haba uburyo bwo kubibika ku buryo burambye kandi bw'ikoranabuhanga ku buryo byazamara igihe kirekire bitangiritse, ariko basanze uburyo bwaratekerejweho ariko buhenze.

Mu byahinduka harimo inyito "irimbi" kuko iyo umuntu avuze irimbi ry'abazize jenoside wumva harimo ubusumbane kuko bamwe baba bashyinguwe mu nzibutso abandi mu amarimbi kandi bese barazize Jenoside yakorewe Abatutsi akaba ari imwe mu mpamvu iyo nyito yahinduka. izindi mpungenge iyo bavuze

ko umuntu ashyinguye mu irimbi watekereza ko hari igihe kizagera iryo rimbi rikaba ryasenywe hakajya ibindi bikorwa ariko urwibutso ruzahoraho kandi n'inyito ubwayo isobanura uko kwibuka.

Ubundi irimbi rya Jenoside ni ahantu hashyinguwe mu buryo bwa rusange imibiri y'abantu bazize jenoside yakorewe Abatutsi. Mu itegeko ryari risanzwe rikoresheya ni agace c) haba harifujwe ko mu itegeko rivuguruye kazabamo.

Urwibutso rwa jenoside ni ahantu hashyinguwe abantu bazize jenoside cyangwa hatashyinguwe hafite cyangwa hasobanura amateka yihariyemuritegurwa no mu ishyirwa mu bikorwa rya Jenoside.

Kanzayire Gertrude



Bamwe mu bakozi ba Komisiyo y'Igihugu yo kurwanya Jenoside bitabiriye inama.

Nta Jenoside yashoboka leta itayigizemo uruhare

Ubuhamya bwa Nyiramutabazi Gloriose, ku bwicanyi bwabereye ku musozi wa Kabuye ya Gisagara

Ubuhamya bwa Nyiramutabazi Gloriose, ku bwicanyi bwabereye ku musozi wa Kabuye ya Gisagara, no ku ruhare ubuyobozi bwagize mu kwica Abatutsi bari bahuriye kuri uwo musozi.

Hari imisozi myinshi yagiye igwaho Abatutsi benshi. icyo abarokotse bari bahuriye kuri iyo misozi muri Mata 94 bahurizahomubuhamya bwabo, ni uko abo bantu bagerageje kwitabara babasha no kwamurura ibitero by'abitwaje intwara za gakondo bashakaga kubica. Kugira ngo abo bantu bari bahungiyeye kuri iyo misozi batsembwe, ni uko barashwe n'ingabo za leta zaje zitwaje intwara zikomeye zagombye kuba zirinda abenegihugu ahokubica. Urwo ruhare rw'ingabo za leta rukerekana uruhare rw'ubuyobozi bwa gisilikare na gisivile muri Jenoside yakorewe Abatutsi.

Nitwa Nyiramutabazi Gloriose, nkaba ntuye mu kagari ka Gisagara, Umurenge wa Ndora, Akarere ka Gisagara, Intara y'amajyepfo. Mbere ya Jenoside n'ubundi nari ntuye ino aha, kuri uyu musozi wa Kabuye. Ni ukuvuga ngo mbere gato y'uko Jenoside itangira, twajyaga kubona tukabona abantu bitaga abahutu bari ahantu, mu nama. Twabonaga bajyayo ariko tutazineza ikibajyanye. Abatutsi bagasigara ku ngo zabo bonyine. Abahutu bese bakazamuka, ari abatuye mu kabande n'amatungo yabo bakajya kurara ahantu bita muri Jagwari. Ni

ukuvuga ngo Jenoside yatangiye twenyine turara ku musozi wa Kabuye, abahutu nta n'umwe urara kuri uwo musozi. Ni ukuvuga ngo rero bakoraga amanama kuri iyi misozi yose ikikije Kabuye.

Ubwo kuwa gatatu, hari ku matariki ntibuka, twagiye kubona tubona abantu b'impunzi batangiye kuza, baturutse ahari Komini Kibaye, Muganza, Muyaga, na Nyaruhengeri na bacye bo muri Shyanda. Bose baza bahunga. Bamwe bahita babitabaza ngo bajye mu buyobozi ahari Superefe Ntawukuriyayo Dominique.

Nukuvuga ngo natwe twaragiye. Hari habaye n'isoko hari kuwa gatatu, noneho tuhageze, urumva byari biteje umutekano mucye, isoko rivuyemo, aravugaga ati noneho ndavuze ngo mwese mugende i Kabuye. Ni ukuvuga ngo twese twahise tumanuka tujya i Kabuye, ariko n'ubundi twebwe, ariho tuvuka. Na babandi baraza. Baza i Kabuye. Ariko tuhageze, bamwe bakavugaga bati ariko ibi bintu ntabwo ari umutekano. Bamwe batangira kuvuga bati reka tugende tujye za Kibayi. Abandi bati reka da, murajya i Kibayi kandi natwe ariho twaturutse batwirukana. Abandi bati muraje kandi ariho twaturutse.

Bamwe baranga baragenda, barimo nabo muri "famille" yacu, bageze i Muyaga Superefe arabagarura.

Ubwo twagumyaho kuwa gatatu, kuwa kane ku wagatanu. Kuwa gatanu ndibuka twari tugeze harya hasi y'aho urwibutso ruri, twikoreye utuntu. Kuko twe twari hafi, twasubiraga inyuma tukajya gushaka utuntu two guteka.

Ubwo Superefe yaraje ari mu modoka, ari kumwe n'uwaye kuba Burugumesitiri, yitwaga Fideli, ari kumwe n'umucuruzi witwaga Kayitani, ari kumwe n'umuntu wigaga muri Université witwaga Gisagara, ari kumwe na Ndayisaba Antoni, n'uwitwa Metero, n'uwitwa Kamanzi wigeze kuba Burugumesitiri, abo ni abo narinzi. (n'abapolisi babiri, umwe yari umuburigadiye witwaga Visenti, we nari muzi). Ubwo yahise aduhamagara avuza ifirimbi ati mwese muze. Turabegera bati mwebwe, ntabwo turi bubice, nta kindi kibi turi bubakorere, twebwe turajya mu mazu yanyu gucunga niba nta masasu mwagiraga, none kubw'ibyo mwebwe nimugende, n'uwasigaye mu rugo mumuzane, mumubwire ko hari umutekano, natwe tugiye kubazanira amashitingi. Uwasigaye mu rugo tukagenda tukamubwira tuti uzi ko bagiye kuduha amashitingi, ngwino nawe ufate shitingi. Bagiye no kutuzanira ibiryo nta kibazo. Ubwo utuntu twose turasahura tubizana hahandi kugira ngo

batagira ibyo basanga no mu nzu zacu.

Abapolisi bazanye bahise babashyira ku mazi, kugira ngo hatazagira uwongera kujya ku iriba kuvoma.

Twafataga amasaka tugasekura tugakora inkamure, twasubiraye tugasanga hari abapolisi bayarinze. Mu kanya bakiri hahandi ni bwo batangiye kurasa imbunda zoroheje, abo twari kumwe bakagerageza kubirukanakana, bari abapolisi nyine bakabirukanana kuri uriya musozi witwaga Gahondo hakurya, bakanabaminura kuko bari abasore benshi, tukabatwaza amabuye kugira ngo babashe kwirwanaho.

Ubwo twahereye nijoro, tuzamuka ijoro ryose, tuzamuka igitondo cyo kuwa nyuma turwana gutyo. Ariko noneho hagati, ubwo nka saa sita cyangwa saa munani, sinibuka amasaha, (z'anywa), nibwo noneho haje intwara za rutura. Ba basore bagendaga bakajya gutembera hirya no hino nibo baje baratubwira bati byarangiye ibyanyu, haje abajepje (G.P: garde présidentielle), haje imodoka zuzuye abajepje, nimusenge ibyacu birarangiye.

Nibwo abantu batangiye kwiyegegeranya, abari abagatolika bakajya ukwabo, abari abapantekote ukwabo, abadive uko, buri wese asengeraga gupfa yejeje

mbese. Noneho rero kuri ya saha, nko hagati ya saa sita na saa munani, ubwo twagiye kumva twumva barashe ibibunda bya hatari amagerenade, ibiki byose. Waba uri kumwe n'abantu ukajya kubona ukabona musigaye muri babiri. Abandi barara bavuye aho. Ubwo hari kuwa nyuma.

Ni ukuvuga ngo njyewe ntabwo nakomeje gukurikirana byinshi kuko hepfo gato ya hariya mwabonye urwibutso, bateye grenade yica abantu benshi, n'umutware wanjye yari arimo, njyewe ntiyamfata. Naragiye ahubwo ngwa ahantu, ngwira igitu kirekire gisongoye. Ubwo narakomeje ndagenda. Barahanterye, ariko abahanteruye sinibuka abo aribo. Uwo nibuka gusa ni Munyeshyaka mu bantu bahanteruye.

Iyo umuntu yapfaga bageragezaga kumuhamba. Bacukuraga akanogo gatoya, bakamushyiramo bakarenzaho itaka. Wawundi wamurenzaga itaka nawe akaba ararashwe. N'uko byari bimeze. Mbese ubwo baranteruye. N'ukuvuga ngo hepfo ku musozi ntabwo nasubiyeyo. Njye sinabashaga kugenda ariko narabonaga.

Baraye uwo muni gutyo, barara gutyo, barasa, bagira gute, abantu bapfa, urusaku rw'amatungo, urusaku rw'abantu,

urusaku rw'ibiki byose, buracyeye ku cyumweru baramuka barasa, birirwa barasa, noneho imvura wumva yaguye ino ahangaha yaguye ari ninjoro, ku cyumweru.

Abantu bamwe baravugaga bati tugende twitwikire, wenda tugende dushobora kuzagera i Burundi, muri iyi mvura. Ntabwo bashoboye kugerayo. Nanjye naravuze nti nzabaha kugeza ryari, nanjye nagerageje gukurura, mfite ikibazo cyo kuba nakuyemo inda, urumva umuntu wakuyemo inda, nta muti nta n'ikintu na kimwe cyo kwambara. Ariko nanjye naragiye ngo tugiye i Burundi.

Bagiye bica, bica, ku musozi wa Karama kuko ariho hari inzira, ng'umuntu agende za Kabogobogo azarebe ukuntu yagera i Burundi. Hari mu mvura itabaho, hari mu mvura idasanzwe. Twaravuze tuti ubwo ari mu mvura uwagenda yashobora kubaho, ariko noneho twasanze ba bicanyi, ya mvura ahari ariyo yabateye ingufu.

Karama hasi twagiye bica bashyira mu mazi, bica bashyira mu mazi. Abatarapfuye barakomeje. Jyewe ntabwo nabashije kurenga Karama. Ntabwo naharenze kuko ntabwo nabashaga kugenda, naragiye ndara ahantu mpamara umunsi umwe. Hari ku cyumweru ngaruka nijoro. Narahiriwe

Komeza ku urup. 15

Nta Jenoside yashoboka leta itayigizemo uruhare

Ubuhamya bwa Nyiramutabazi Glorioso, ku bwicanyi bwabereye ku musozi wa Kabuye ya Gisagara

Ibikurikira urup. 14

nijoro ngerageza ngo ngaruke aho naturutse.

Ubwo rero naraje, maze kuza, nsanga guhera kuwa mbere baramuka bakora akazi ko gusonga imirambo. Abayisongaga ni abantu babaga bakoresha intwari za gakondo, amahiri, amacumu, imihoro, ibintu byose nk'ibyo ngibyoye, ari nako basahura bya bintu bahataye.

Si abaturage baho hafi (babasongaga), nabo barimo, ariko hakaba na ba bandi baturutse muri ibyo bitero, hari n'abarundi barimo, kuko hari abarundi bari bafite inkambi ahantu bitaga mu Rubanda, Muganza, n'abantu bo ku Muyira, n'abo ba karama. Aho niriye ku wa mbere narababonaga, ab' I Karama baza bikoreye amamatola, amavarisi. N'ubundi baje gusongwa n'abantu barututse kuri iriya misozi yose ikikije Kabuye.

Ubwo rero naraje ngaruka kuri wa musozi, wajya kubona ukabona ukubitanye n'umuntu utahwanye. Ubwo rero ndaza, ubwo hari hamaze kuba ku wakabiri. Naravuze nti reka ngende ndebe ko nashobora kugera i Ndora. Ni hafi y'aho Umurenge wacu uri. Naragiye rero, mpura n'abakobwa twari duturanye nabo bashakira kunyica. Nari nifubitse "couvre lit", (nari mfite couvre lit nziza, mukuru wanjye yajyaga akora mu bazungu, nagiraga ibikoresho byiza byo



Aha ni ahari imibiri Kabakobwa hatarubakwa urwibutso.

mu bazungu), nahise nyibaha, ndababwiranti mwaretse nkabaha iyi couvre lit mukandeka nkigendera. Bahita bayakira ndagenda. Nari ngiye kwa mukuru wanjye wabaga i Ndora mpura n'abakobwa babiri Mukashyaka na Zirungwe, baravugaga bati: "turakwica". Ndavugaga nti ko mushaka kunyica ndi mwene wanyu (Mukuru wanjye yari yarashatse muri famille yabo), nimunanyica muraba mwihombeje, njyewe ndi mwene wanyu, Belancilla washatse iwanyu turavukana. Abakobwa ubundi barambonye, barabyina cyane bishimye bati "turasamuye".

Ubwo rero b a r a n s h o r e y e banjyana yo kuri uwo mukuru wanjye, bati "nakumenya t u r a k u r e k a , n a t a k u m e n y a turakwica. Mpageze abana barasohoka,

ntibari bazi ko nkiriho, barishima batii dore Gloriosa weeee..... N'abakobwa nibwo bahise babona koko ko ari byo bahita bagenda.

N'ukuvugaga rero ko ibindi nakomeje kubona ahubwo ari ibya Ndora, kuko namaze igihe kwa mukuru wanjye.

Ku kibazo cy'abantu benshi bari bahungiyeye ku musozi wa Kabuye Mukamutabazi yagize icyo yongeraho

Ku musozi wa kabuye hari heraniye abantu baturutse imihanda yose, kuko urabona Superefegituray'inyari Gisagara. Ni ukuvugaga ba bandi baturutse Kibaye, Muganza, Nyaruhengeri hose, baje bazi ko baje kwitabaza superefe Dominique, kuko bari bazi ko ari umuyobozi wabo, bati buriya nitugenga araturengera nka superefe utuyobora. Noneho nawe, kuko mwabonye ko kano gasozi ari agasozi kari hagati, kari hasi, nawe niko yatoranyije ati

mwese mujye i Kabuye.

Ariko nsubiye inyuma gato, ku wanyuma noneho, ni ukuvugaga ngo hari abandi bari baranze kuhava (Ndlr: kuri superefegitura), bati ahangaha ni ku buyobozi, tugomba kuguma aha byanga byakunda. Noneho we yarabishorereye. D o m i n i q u e Ntawukuriryayo, ubwe yafashe abapolisi, n'abandi baturage b'abicyanyi ba ruhara bashorera ba bantu barabazana no ku musozi wa Kabuye. Noneho ako kanya bakihabageza (kuko batangiye kubashorera nka saa tatu, noneho bamaze kuhabageza nibwo bazanyeye bya bitwari noneho).

Ariko rero nanone, hagati aho naje kuwa kuri wa musozi wa Ndora banyirukanyeye, nza kuba ino i Kabuye nanone. Hano hepfo y'urwibutso mpafite mukuru wanjye

nawe wari warashatse umugabo w'umuhutu. Nagiye kubayo.

Superefe ubwe yaraje (kuko iyo mirambo yaje kubora hatara amasazi menshi cyane, abantu bajya kuvoma amazi bagasanga arimo inyonyonyi imirambo yangiritse cyane. Noneho abantu baratabaza bati abantu bagiye gupfa kubera macinya), nibwo bazanyeye abanyururu kugira ngo bayihambe babakuye i Butare. Haje ibimodoka birimo abanyururu na za kateripirali, noneho baje superefe atangira gufata abantu kugira ngo bazane amazi yo kugira ngo bafungure imiti ya kirolini bari bazanyeye kugira ngo noneho babanze batere mu mirambo ya miti, kugira ngo umwuka unwe ya miti noneho ye gukomeza kunukirwa n'imirambo.

Ubwo rero yigeze kuza ansanga mu nzu aho nabaga, kwa mukuru wanjye. Ntiyankubise cyane byo kunyica, yari afite urukoni rururure abwira abantu ngo nimuzane amazi nimuzane amazi. Yagendaga areba mu mazu kuko hari abantu bari bihishye badashakira kujyayo, muri kwa kuza aza muri ya nzu ansangayo. Yarankubise ya nkoni, arankubita ibitugu, arandyamisha, ankubita ahantu hose habaho. Nuko icyakora abantu baragenda bajyana amazi, mukuru wanjye nawe aragenda arayajyana, n'abandi baturanyi baragenda. Imiti bayifunguriraga hafi aho, abanyururu bafata ibikondo bakayajyana.

Ku byerekeye

uruhare rw'abari abayobozi mu bwicanyi bwabereye ku musozi wa Kabuye Superefe N t a w u k u r i r y a y o Dominique, cyane cyane yakoranye n'uwitwaga Ndayisaba Antoni, yigeze kuba Burugumesitiri wa Komini Ndora ariko ntabwo yari akiri Burugumesitiri. Uwari Burugumesitiri icyo gihe yari umugabo witwaga Selesitini. Noneho baza kuvugaga ngo ni Ntamwete, noneho baza gushyiraho Uwizeye Fidèle. Uwizeye Fidèle, nawe yagendaga muri ibyo bitero, no muri ayo Manama yabaga arimo, cyane cyane...yari umwicanyi bya hatari, na Mbarushimana Emmanuel, wari Diregiteri w'amashuri waturukaga i Muganza, akazana ibitero by'abarundi, n'uwitwaga Gisagara wigaga muri Université. (.....)

Uhereye ahubutse urwibutso, abantu baramanukaga bakagera ku musozi wa Rubibi, bakagera hasi ku kabande. Abaribahatuye hafi ya bese bari abatutsi benshi. Ongeraho noneho abaturutse imihanda yose. Ariko si kuri aka gasozi konyine bapfiriyeho, hari akandi gazozi hirya bita ngo ni ku Gatwari, naho hari hateraniye abandi bantu. Nabo barashwe n'abantu bahagaze Ndora. Hariya n'uko ariho hari benshi cyane bikabije. N'ab' i Gatwari barabazanyeye bari hano ku rwibutso rwa Kabuye.

Reba n'ubuhamya bwa Burizihiza na Mukankundiye 17-18

Nyarubuye: gahunda yo gukangurira imiryango ifite abantu bashyinguwe mu ngo kugira ngo bazanwe mu rwibutso

Imibiri y'abazize jenocide yakorewe Abatutsi mu 1994 yagiye ishyingurwa mu buryo butandukanye n'ahantu hatandukanye bitewe kandi n'impamvu zitandukanye. Hari abashyinguwe mu ngo ahahoze hatuwe n'abacitse ku icumu ariko bakaba batakihatuye, hari abashyinguwe mu nzibutso ndetse no mu marimbi y'abazize jenocide. Bitewe rero n'uko abashyinguwe ahandi hatari mu nzibutso usanga nta buryo burambye bwo kubitaho, ni byiza ko iyo mibiri ivanwa aho hantu ikazanwa mu nzibutso.

Ibyiza rero ni uko bazanwa mu nzibutso ku buryo n'abazakomoka ku miryango y'abafite abayo bazize jenocide bazajya bavuga bati abacu bazize jenocide bashyinguwe hariya (mu rwibutso).

kuko n'uwatsindiye isoko yamaze kuhagera kandi ko nyuma yo gusana hazakurikiraho kubaka imva hanyuma imibiri ishyinguye muri shitingi igashyingurwa mu cyubahiro. Ubu rero imirimo ijyanye no gusana yaratangiye

n'ingaruka zayo, gushakisha imibiri yabo kugira ngo ishyingurwe mu cyubahiro. Iyo urebye imibare y'abazize Jenocide ukayigere ranyana n'iyabashyinguye usanga ko hari itaraboneka myinshi. Tutirengagije ko hari iyo tutazigera tubona nk'iyajugunywe mu mazi. Hari ikiri mu mirima hirya no hino ndetse no mu bwiherezo "toilette" hatazwi.

Nyuma y'imyaka 17 Jenocide yakorewe Abatutsi mu Rwanda ibaye, ku rwibutso rwa Nyarubuye mu gice cyarwo cy'ahahoze ari inyubako y'abenebikira, mu bwiherezo abo babikira bakoreshaga habonetse imibiri igera kuri itandatu, imyenda, inkweto imigozi bigaragara ko babatayemo bababoshye ndetse n'umuhoro. Ubwo bwiherezo ntibwari bwarongeye gukoreshwa kuko bwakerekwaga ho kubamo imibiri y'abazize Jenocide yakorewe abatutsi.

Icyo nsaba Abanyarwanda bose n'uko ahantu hose bakeka ko haba hari imibiri bazajya bahamenyeshahabubegereye ubwo aribwo bwose (ingabo, polisi n'inzego z'ibanze).

**GASENGAYIRE
J.Claudine**

Umukozi wa CNLG

Ngoma-Kirehe

Ni muri urwo rwego rero hari imiryango igera kuri itatu ifite abantu bashyinguye mu ngo twegereye turabaganiriza ku cyifuzo gihari cyo kuvana imibiri y'abacu yashyinguwe mu ngo cyangwa n'ahandi kugira ngo ivanwe aho izanwe mu rwibutso.

Bose rero usanga batabyumva kimwe kuko hari ababyumva vuba abandi nabo bigasaba kubanza kwigisha.

Abo twaganiriye bose ariko nyuma yo gusobanurirwa ibyiza byo kubazana mu rwibutso batwemereye ko bagiye kubanza kubiganiyeho nk'umuryango noneho bakazafatira icyemezo hamwe. Ariko nabo hari ibyobasabakobyabanza gukorwa ku rwibutso. Izo nzirakarengane zishyinguye mu ngo ni umuryangowa HIGIRO Prospère, uwa Karenzi n'uwa Rwakayigamba Ferdinand. Twaganiriye na murumuna we BAGARAZA, atubwira ko hashyinguye abagera kuri 15. KARENZI niwe twivuganiye atubwira ko hashyinguye abagera kuri 40.

RWAKAYIGAMBA Ferdinand twarivuganiye atubwira ko abashyinguye iwabo bagera kuri 25.



Kiliziya ya Nyarubuye yicivemo Abatutsi benshi muri 1994.

Ibyiza byo kwimurira imibiri mu nzibutso

Kubera ko hari aho usanga hashyinguye, kandi ba nyir'abantu batagituye aho hantu (urugero ni nk'abana bacitse ku icumu usanga baba nka za Kigali mu miryango yabakiriye, abandi baba ku mashuri igihe kinin, bityo ugasanga aho iyo mibiri yashyinguwe hatitaweho, nta suku ndetse n'amatungo ashobora kuhavogera akangiza izo mva barimo).

Iki n d i

tutakwirengagiza ni uko igihe cyose abantu bagiye bashakisha ubuzima ku buryo ejo cyangwa ejo bundi n'abatuye hafi y'aho bashyinguye ababo bashobora kuhimuka ndetse bakaba banahagurisha, ibyo kuhitaho bikaba bitagishobotse. Niba bigenze gutya rero, byanashoboka ko uwahaguze yahakorera n'indi mirimo imufitiye inyungu.

Nyamara inzibutso zizahoraho, ntizimurwa kandi hari icyizere ko n'izitaweho zizitabwaho kuko leta ibifite muri gahunda.

Ingorane iyo gahunda ihura nazo ku rwibutso rwa Nyarubuye

Nkuko twavuze haruguru ko hari abatwemereye vuba icyifuzo cyo kwimurira iyo mibiri mu nzibutso, ni ko banasobanura impamvu bagirabati: *"nimubanze mushyingure abari ku rwibutso bashyinguwe muri za shitingi kandi musane urwibutso tubone natwe tuzane abacu mu rwibutso"*. Nyuma yo kumva ibibazo nk'ibi rero tubabwira ko urwibutso rworugiyegusanwavuba

kandi twizeye ko n'ibindi bikorwa bikenewe gukorerwa urwibutso rwa Nyarubuye bizakurikiraho uko ubushobozi buzagenda buboneka.

Dushakisha imibiri y'abacu bazize Jenocide

Bariya babyeyi, bakuru, barumuna bacu ndetse n'inshuti zacu bishwe bazira uko baremwe ni inshingano za buri munyarwanda wifuza gufatanya n'abandi kurwanya jenocide n'ingengabitekerezo yayo no guhangana

Ubuhamya bwa Mukankundiye na Burizihiza ku bwicanyi bwakorewe ku musozi wa Kabakobwa yo muri Huye mu gihe cya Jenoside yakorewe Abatutsi

Jyewe nitwa Mukankundiye Matilda, nkaba ntuye mu Murenge wa Mukura, akagari ni Cyeru, umudugudu wa Sahera. Mu by'ukuri aha hantu Kabakobwa jyewe naraharokokeye, kuri 21/4/1994 naraharaye buracya ari ku wa gatanu 22 ndahirirwa, aha hari abantu baturutse imihanda yose, uturere twose kuva muri za Gikongoro no kuva za Gisagara, kuva za Nyaruhengeri, za Kigembe aha hantu hari isi n'ijuru. Kuva ku nkengero z'akabande kugeza ku musozi ruguru, hari abaturage benshi cyane utashobora kubona. Ni kuvuga ngo naraharaye ndahirirwa, jenoside yo kwica yatangiye neza mu masaha ya saa cyenda. Abatutsi koko bari benshi aha hantu barareba basanga ntahantu bahera kugira ngo babice. Nibwo bavuze bati twebwe abatutsi bari ku Kabakobwa baratunaniye.

Badutera gaba baturutse kuri Nkubi, Sahera, Nyaruhengeri, Kibirizi hose baramanukaga bakaza bakica. Ubwo icyo gihe saa cyenda bamaze gutabaza Kanyabashi wari Burugumestri wa Komini ya Ngoma. Niwe rero waje kohereza abasirikare, abapolisi, baraza igitero, batayo imwe ihagarara aho haruguru, abandi bahagarara hakurya mu dukombe tunyuranye, bararasa,

abandi bakoresha gakondo. Hano hari isi n'ijuru, mu by'ukuri ntabwo navuga amamiriyoni yari hano ku Kabakobwa.

Ubwo baraturashe abandi bakoresha imipanda, abandi bakoresha udufuni, ubwo jyewe nahunze ngana aho hakurya za Kibirizi. Ariko imiborogo yari iri aha ngaha yari iteye ubwoba. Ubwo naje guhindukira. Abanyarubirizi, interahamwe zaho zarongeye ziratugarura, turazongoreye ku nidusubire ku Kabakobwa aho twari turi ngo n'ubundi tuhafire, ngo "mwa bagome mwe, ngo mwagize gutwika amafaranga mwari mwanunganye, mugira gutwika ibintu byose byari bihari ngo none murarushya muhunganira ahangaha", ngo "muragana hehe ko mutagira aho muhungira"

Ubwo rero naragarutse ndara mu gishanga. Nari mfite inda nananiwe. Nikubise mu mazi, nanirwa kuvamo, icyo gihe bancaho baza gusahura ibyari biri ahangaha, bariho banigana. Noneho jyewe ndyama mu masaha yari aho mu kabande. Ubwo rero bwaracyeye ari kuwa gatandatu nibwo batuzamuye ngo nidusubire ahari ku iseta. Naraje nsanga imirambo ahangaha, harimo mabukwe twari tumwe. Abantu benshi cyane ari imirambo, badushyira



Madamu Burizihiza Rose.

ku murongo ngo nimwongere mwigere ahangaha mupfe.

Sinzi ukuntu rero mu kanya gatoya ubuyobozi bwamanutse, harimo Habyarimana Pascal yari uw'iwacu hariya i Sahera. Araza ati nimube muhagaritse ubwicanyi ati hari itangazo risohotse no naha, rivuga ko hajeho ihumure ry'abagore n'abakobwa. Ubwo nibwo bahagaritse narimaze kugera neza ku iseta kugira ngo nanjye banyice, abandi bose bari bamaze kubica. Habyarimana yari Konseye wa Sahera.

Nibwo bahise rero bahagarika ubwo bwicanyi ngo haje ihumure ry'umugore n'umukobwa. Ngo arikouwitwamugabo n'umuhungu arapfa. Nibwo rero icyo gihe baje bazamura agakanzu k'umwana w'incuke narimfite narimpekeye ku nda barebye igitsina cye basanga ni agahungu.

Basanze ari agahungu barambwira ngo baturutse bawicaye aho ngaho.

Icyo gihe rero nibwo Imana yakoze ibitangaza nk'uko yakomeje ibikora numva baravuze ngo mwese muhaguruke ahangaha mugende. Ndongera ndagaheka kuko kari kambaye agakanzu. Turataha tugeze iwacu hariya i Sahera aho bita icyeru nyine ubwo badushyira mu ishuri, baturundamo mu ma saa cyenda z'amanwa. Baraza uwitwa Kanyabashi yari Burugumestri dukorana inama n'abayobozi bose barimo ba Pascal Habyarimana wari Konseye wa Nkubi, n'abandi baserire naba resiponsabure bari bariho icyo gihe bakora inama baratubwira ngo buri umwe wese asubire mu itongo rye, ngo uwo basanga yatwikiwe, ngo uwo basanga hasenywe ngo agerageze ukuntu

yajya mu itongo rye. Ni uko nguko twavuye aha ngaha ku Kabakobwa ariko ndakubwiza ukuri amateka y'abakobwa sinzabyibagirwa kuko naraharaye ndahirirwa ndaharokokera.

Ubwo ngubwo twagiye mu matongo, nkomeza kuba muri ubwo buzima bwo kuba mu matongo ndinda ubwo mbyara. Narakubiswe ubumfite ubumuga ntavuga ariko Imana yakomeje kundinda, kugeza kuri uno muni.

Ku byerekeye uko abari bahungiyeye ku Kabakobwa bagerageje kwirwanaho

Nakubwiraga ko bahanganye kuva ku wa kane ni mugoroba wa joro buracya ku wa gatanu kuri 22 guhera sa kumi n'imwe za mu gitondo birwanaho kuko babateraga grenade. Twajyaga kubona tukabona hari uwo bakubise grenade aragaramye, igihe bene wabo bajya guterura bajya kumuzika ahantu bakaba bagaritse undi gutyo gutyo, birirwa bahangana gutyo. Byageze rero saa cyenda nibwo hamanutse batayo y'abasirikare, abapolisi iwacu bari bahari bitwaga ba Kaniziya, aha ku Nkubi hari abapolisi n'abasirikare, na batayo rero yaturutse mu mujyi. Bakoresha noneho

imbunda n'amasasu. Barakora ariko bakora akazi, abandi nabo b'interahamwe bari basanzwe ari abaturage bahano bakoresha imihoro n'amafuni, nuko ng'uko byagenze.

Nitwa Burizihiza Rose, nkaba mpagarariye abacitse ku icumu mu murenge wa Mukura. Ku harokokera nanjye naraharokokeye. Tuvuze imibare y'abantu bahaguye barenga ibihimbi 60. Ariko ni ukugereranya, abandi batubwira ko ari ibihumbi ijana. Ikintu cyaje kutubabaza rero ni uko nyuma ya Jenoside, nk'umuntu wari umutegetsu icyo gihe witwa Burugumestri Mukarungana Ignaciana yateje ishyamba, tubona biratubabaje nk'abantu bahafite abantu, ariko uwo twaregaga niwe twaregeraga. Ishyamba rirakura, tubona birenze ukwemera. Ku buryo jyewe no muri icyo gihe twajyaga dushwana, (nanjyenariumuyobozi nari Konseye wa Sahera), ngaragaza ikibazo cyanjye. Nyuma rero mbonye ko ibintu bimaze gukomera, nk'umuntu uhagarariye abacitse ku icumu, muri uyu mwaka wa 2010 ndavugaga nti ninshaka nzabizire arinjye ntange ikirego.

Nanditse nsaba ko byibuze badukuriraho iri shyamba, nandikira ubuyobozi bw'Akarere, mpa kopi ahantu hose hashoboka muri

Ubuhamya bwa Mukankundiye na Burizihiza ku bwicanyi bwakorewe ku musozi wa Kabakobwa yo muri Huye mu gihe cya Jenoside yakorewe Abatutsi

Ibukurikira urup. 17

Ibuka, muri CNLG, muri MINALOC, ahantu hose tubona ari ngombwa, ntanga no mu ngabo na polisi.

Wenda ikintu twishimiye gito ni uko ingabo na polisi badufashije gukuraho iri shyamba. Bahamagaye umugabo we Nyampenda bamutegeka ko ibi biti bigomba kuvaho bafatanyije n'umurenge wa Mukura. Arabyemera aravugaga ati ubwo ni ikosa nyine ryarabaye, ndasaba imbabazi. Ibiti ingabozirabitema, ariko murabibona ko n'ubundi ryongeye ryashibutse, mu by'ukuri ntabwo bikwiye. Ahantu

hashyinguwe abantu bangana gutya, barenga ibihumbi mirongo itandatu kuba mu ishyamba(...) nibura bagire ikintu bahakorera kugirango tuboneko hatunganye.

Jye nabanje no kwibaza ndavugaga ngo mu rwego rw'abacitse ku icumu iyo tugira amafaranga, twari gushaka umwavoka tukarega uriya B u r u g u m e s t r i Ignaciona kuko yabikoze abizi kandi yabikoze abishaka. Ndahamya ko hari ibindi bintu yari yishingikirije kuko ni ibintu byagaragariraga buri wese.

Tukaba rero dusaba ubuvugizi, gusa hari intambwe umuyobozi yateye ntatinya

kuvuga, Umuyobozi w'Akarere uriho ubu. Yaravuze ati "rwose ngiye kubafasha, Kabakobwa nanjye nageze muri Huye ndayumva, ngiye kubafasha turebe icyo twakora". Ubwo nawe yaturemye umutima . Na Komisiyo imwe y'abadebite yaradusuye.

Mu by'ukuri twari twarifujye nka Komite z'abacitse ku icumu bo mu Murenge wa Mukura ko nibura haba urwibutso mu rwego rw'Akarere ka Huye, kuko twabonaga ahandi za Murambi babara ibihumbi mirongo itatu ariko hano turabara ibihumbi mirongo itandatu. Twabonye ariko byanarenga.

Baza kutubwira ko

nta muhanda uhari ariko umuhanda nawo ukorwa n'abantu kuko n'abaje kwica babazanye mu modoka, baraparika bakajya bateramo ibibombe. Ariko niba ubwo bushobozi bwo kuhakora urwibutso rw'akarere budahari nibagire ikindi kintu bahakora haba amateka bahazitire neza abantu babavanemo, habe ubusitani se, abantu baze bahasura bavuge ibyaho, mu rwego rwo kugirango ibintu bitazibagirana. Hari ikintu twasabye mu rwego rw'igihugu rwa Gacaca ko habaho Gacaca yihariye nk'ahantu habereye amarorerwa. B a t w o h e r e r e j e abanyururu bemeye ibyaha, Gacaca tuyikoreramwo hano muri iri shyamba . Mu

by'ukuri abanyururu bireze baravuze bati aha hantu iyo mibare muvuga ni mike twe twabonaga ari ku ibagiro, twari twategetswe n'abategetsu bari bariho ba Kanyabashi, koloneli Muvunyi ufungiyeye Arusha, abayobozi mu nzego zitandukanye bose bari ahangaha.

Aka gasozi kose ureba kugera hariya epfo mu kabande harimo abantu ariko ubu imizi y'ibiti yagiye ibarya, ubu nubwo twataburura wenda twabona imibiri y'ibisigazwa n'amagufa make, ariko barimo. Twari twifujye ko buriya biti byarimburwa byibuza iyo mibiri tutabasha gukuramo neza, tukahazitira tukajya tuza tukajya tuhasengera. N'ubundi buri mwaka tuza kuhavugira misa, ariko

byibuza hakazitirwa kugirango aba bantu batatabururwe nabo bahabwe icyubahiro kuko uko abantu bahinga hariya mu nkengeru, bakuramo imibiri, tukajya gushyungura(...)

Mu mwaka wa 2010 rero abantu batangiye guhamuka batekereza abantu babo bari aha n'ibiti bibateye hejuru. Umunsi umwe igiti cyabaga cyakuze cyabyibushye, abantu batangira guhamuka najye mbona nta kundi nemera kwangana n'abo bayobozi nyine ndabarega. Ubwo nta kundi byari kugenda kugira ngo amateka agaragare nibyabereye aha bimenyekane.

Byakiriwe na A.R

Ikibazo cyo kurangiza imanza z'imitungo za Gacaca uko gihagaze mu Karere ka Karongi

Ikibazo cyo kurangiza imanza zimitungo za Gacaca inkingi y'ubumwe n'ubwiyunge uko gihagaze mu Karere ka KORONGI ntizirarangira .Nko mu murenge wa BWISHYURA izo manza z'imitungo za Gacaca ntabwo zirarangira dore ko zifite imbogamizi nyinshi .Twaganiriye na bamwe mu baturage bo mu murenge wa Bwishyura batubwiraye y'uko batarishyurwa

ndetse babona bitazarangira vuba aho bavugaga ko babona kubishyura bikiri kure kuko abagomba kwishyura babona batabyitaho ndetse ntibabihe n'agagaciro n'ubwo Abayobozi ntako bataba bagize.Twavuganyeye n'ushinzwe Etat civil w'umurenge wa BWISHYURA atubwiraye zimwe mu mbogamizi bahura nazo. Hari ubwo usanga bamwe mu bagomba kwishyura iyo mitungo ari

abakene bamwe badafite ikintu na kimwe babona nibyo kurya bibagoye. Ibyo rero ugasanga biri mubidindiza kwishyura imitungo Cyakora ngo bagiye kwiha igihe cyo kubirangiza n'ubwo bitoroshye kubera izo nzitizi twavuze haruguru.

Uwamariya Pascasie

Umukozi wa CNLG /Akarere ka Karongi na Rutsiro

Uko ikibazo cyo kurangiza imanza z'imitungo giteye mu Karere ka Gakenke

Mu manza z'imitungo 11640 akarere ka GAKENKE kari gafite,murenge wa GAKENKE wonyine wari ufitemo imanza 936. Izi manza zose zaraciye ndetse no kuzirangiza hakaba hasigaye urubanza rumwe gusa narwo rukabarurimunzirazo kurangizwa. Ibibazo byagiye biboneka mu kurangiza imanza z'imitungo mu murenge wa gakenke ahanini akaba ari nko kuba abangije imitungo bari abakene ku buryo usanga nta

bwishyura bashobora kubona, abangije imitungo badafite aho babarizwa hazwi,cyangwa se abapfuye imiryango yabo ikazima kuburyo habura uwishyura.

Kugirango yimitungo yishyurwe hakaba harafashwe ingamba zikurikira ;

-kubarura abantubose bangije imitungo

-gushakisha abimutse aho baba baherereye ngo bishyuzwe

-uruharerwaburiwese

bireba mu kwishyura iyi mitungo.

Izi ngamba zafashwe zatanze umusaruro ugaragara kuko nk'uko twabivuze hejuru hasigaye urubanza rumwe gusa kandi narwo rukaba rutazagorana kuko bitarenze ukwezi kwa Gashyantare 2012 ruzaba rwararangijwe..

M u k a m u k e s h a Julienne Umukozi wa CNLG/Akarere ka Gakenke na Ngororero

Abayobozi bo mu ishyamba rya A.C.D.P ryo mu gihugu cy'Afurika yepfo basuye Komisiyo y'igihugu yo kurwanya Jenoside

Abanyafurika y'epfo bari mu nzego z'ubuyobozi bw'ishyamba rya gikirisitu riharanira demokarasi(A.C.D.P; African Christian Democratic Party), ku itariki ya 19 ugushyamba 2011 bagendereye Komisiyo y'igihugu yo kurwanya Jenoside(CNLG) bagamije gusobanukirwa neza Jenoside yakorewe Abatutsi, uko yateguwe n'uko yashyizwe mu bikorwa. Bahawe ikiganiro na Bwana Karengera Ildéphonse umuyobozi w'ishami ryo kwibuka no gukumira Jenoside.

Mbere yo bafata n'icyemezo kubasobanurira ko abo bazafatany icyerekezo rusange kuyobora ari n'inshinganoza CNLG Abatutsi. ndetse n'ibikorwa byayo, Bwana Karengera yabanje kubereka ko Jenoside yakorewe Abatutsi mu Rwanda mu mwaka w'1994, uretse kuba yateguwe n'ubuyobozi bw'u Rwanda bwa mbere ya 94, ikomoka no mu mitegekere yazanywe n'abazungu bamwe bakolonije uRwandamberey'uko rugera ku bwigenge

Bwana Karengera Yabasobanuriye ukuntu URwandarwa mbere y'u Bukoloni rwari rutuwe n'Abahutu, Abatwa n'Abatutsi, nta gihe na kimwe ibyo byiciro by'abenegihugu bari barigeze bashyamba ari na cyangwa bicana. Yerekana ukuntu ari abakolonib'Ababiligi, bageze mu Rwanda bazanye ibitekerezo bitandukanyabanyarwanda, bafata n'icyemezo ko abo bazafatany kuyobora ari Abatutsi. Ariko igitangaje akaba ari uko abo bazungu bashatse ko bayoborana n'Abatutsi bonyine, aribo nyuma baje kumvisha abahutu ko baryamiwe n'Abatutsi, ko bakorewe akarengane. Batangira no gukwiza mu Bahutu ibitekerezo byo kuvuga ngo Abatutsi atari abenegihugu nyakuri, ko ari abavantara. Bwana Karengera yabagaragarije ko ibyo bitekerezo byumvishaga abahutu ko bakandamijwe, aribyo byaje gutuma bashinga ishyamba rihuriyemo ubwoko bumwe, mu gihe ubundi amashyamba atagombye kugira ivangura, ngo rigire abo riheza. Nkuko byerekanywe n'uwatanga gahungu ikiganiro, ibyo bitekerezo byaje no gushyirwa mu



Bwana Karengera Ildéphonse (uwa kabiri uturutse ibumoso) mu ifoto na bamwe mu bayobozi b'ishyamba ba ACDP, nyuma yo kubaha ikiganiro.

kiswe amategeko cumi y'Abahutu yakanguriraga abantu urwango rukabije rw'abatutsi, byakomeje guhemberwa n'ubuyobozi bwa mbere ya 94. Aha bwana Karengera, yagarutse ku madisikuru ya Prezida Kayibanda.

Abashyitsi bo mu gihugu cy'Afurika y'epfo bamaze

gusobanurirwa imiterere y'ubuyobozi bw'u Rwanda bwa mbere ya Jenoside kuva mu gihe cy'ubutegetsi bwa gikoloni, na nyuma y'uko u Rwanda rubonye ubwigenge, bagaragarijwe ko Jenoside yakorewe Abatutsi yabayeye kuva mu kwezi kwa Mata kugeza muri Nyakanga 1994, itatwe n'uko indege

yari itwaye Prezida Habyarimana yarashwe, ahubwo yari yateguwe. "byakumvikana gute ko mu minota itageze ku icumi, nyuma y'uko indege ya Habyarimana igwa, mu makaritiye ya Kigali bwari bwatangiye" (NDLR: inkuru y'ihanurwa ry'iyondege yamenyekanye

bukeye)

Ikindiniuko Abatutsi bishwe ntaho bari bahuriye n'ihanurwa ry'iyondege. Bishwe nta ntwaro bitwaje, bamwe bicwa ari ibibondo, bazira gusa ko ari Abatutsi.

Umuyobozi w'ishami ryo kwibuka, no gukumira Jenoside yasobanuriye abo mu ishyamba rya A.C.D.P ko

Komeza ku rup. 20

